

東
華
續
錄

東華續錄

臣王先謙

臣周潤蕃恭校

乾隆三十二年丁亥春正月丁卯諭據期成額等查審已革知州張宏燧營私交結一案究出伊見有虧空及從前李因培赫昇額會令伊代武陵縣馮其柘彌補虧空銀一萬餘兩等語覽奏深爲駭異李因培前在順天府尹任內曾經獲罪朕不次加恩任用擢至巡撫乃於查辦常德災賑一事玩視民瘼諸未妥協是以將伊照部議降調復念其材堪驅策擯棄殊爲可惜旋即用爲四川按察使初不料其在湖南巡撫任內竟敢授意張宏燧代馮其柘彌補虧空至一萬餘兩之多實爲深負朕恩李因培著革職拏問解往湖北交與侍郎期成額等質訊至常鈞辦事本屬平庸特因其

前此曾在軍營出力是以屢用爲巡撫今於侯七郎毆死侯嶽添一案迴護固執庸懦無能毫無主見不堪復勝封疆之任因降旨令其來京然尙欲畀以侍郎或副都統以策後效今觀其面諭張宏燧等於會印稟帖內倒提月日補送是爲欺詐矣又豈表率屬員者所應出此但較之李因培於虧空之屬員顯然投意徇庇欺蒙之罪尙可稍從末減常鈞著革職赫昇額身係滿洲乃受張宏燧投拜門生始終徇庇實屬卑鄙無恥應俟此案審明定擬到日再降諭旨向來各省虧空案件最爲鉅弊雍正年間經 皇考嚴加整頓稍知斂戢每恭繹 硃批諭旨於此事不啻三令五申人亦不敢輕犯意諸弊漸就肅清朕御極以來三十餘載雖未特降旨查辦然亦有犯必懲乃邇年來不肖之員營私亂法之案疊次發覺豈若輩因稽察稍疏故智復萌耶朕惟自愧水弱之失與誠

之不能感人若再不能執法則朕亦非甚懦弱姑息之主也至督撫爲國家大吏乃於屬員虧空曲爲徇隱其欺罔實法所不容在伊等平日未嘗不以彌縫隙漏爲得計孰知天理昭彰終歸敗露卽如段成功一案其貪贖發自江蘇而侵虧遂敗於山右此案本爲查究侯七郎命案正兇乃於張宏燧供吐見在虧帑情形展轉究詰遂致溺其柘之事水落石出足見天道可畏斷無久而不敗之理外省似此巧爲掩飾之伎倆未經舉發者尙恐不免朕亦不肯令人告訐惟俟其自敗卽行按法懲治決不稍爲寬貸也將此通諭中外知之○戊辰諭昨因李因培令張宏燧代馮其柘彌補虧空一案將李因培革職拏問解往湖北質審所降諭旨未將李因培徇庇欺罔之罪敘明恐不知者或疑李因培已將虧空之員參革究擬似無袒護情形何以復治其罪因命取李因培原參本

細閱卽以李因培原參而論其欺隱實蹟已不能掩今爲一一指出不特眾人知其情真罪當雖李因培亦無可置喙如疏內稱馮其柘虧空穀價係署武陵縣任內之事此必因交代時後任不肯接收是以敗露且據該道及該署府揭報後復令張宏燧往查實數則馮其柘虧空至二萬餘兩雖未詳悉指出而爲數之多已隱躍言外及據張宏燧所查謂伊正雜錢糧尙無虧缺惟穀價一項實虧銀八千九百餘兩遂以此糾參是顯然使虧帑劣員得以避重就輕且以一參爲解紛之計巧詐欺蒙莫此爲甚而猶得藉口於已列彈章乎至張宏燧所供李因培因甫報並無虧空礙難查辦是以欲其彌縫並授意張宏燧設法彌補銀一萬兩種種營私不法實出情理之外督撫爲封疆之表率辦理此等重案敢袒徇欺罔若此此而不嚴加懲創何以肅官方而申法紀特再明白宣

示俾中外共知之○以金甡為禮部左侍郎

由內閣學士遷

○調黃元龍

為四川按察使以富勒渾為廣東按察使

由山西雁平道遷

○乙亥楊應

琚等奏據總兵朱崙報稱緬匪自楞木潰敗大兵復乘勝追剿二

次共殺賊六千餘人當有伊領兵頭目莽聶眇遮來營懇請罷兵

歸順並呈獻金錫紅呢花布等物臣以匪酋猛毒狡詐恐陽言納

款陰圖益兵再舉仍飭朱崙加意防剿旋據報該酋加調匪眾不

下二三萬由僻徑越至土司邊界焚掠經我兵迎擊於十二月初

六七等日殺賊千餘人又於十一十二等日斬獲賊首三百二十

餘級時銅壁關大弄種二弄種及止丹各野人均奮勇出力殺賊

千餘人又於十六日朱崙劉德成分路剿殺共斬賊首三百四十

餘級計前後剿殺已幾及萬人我兵惟遊擊馬成龍力戰陣亡查

緬甸原係邊南大國密菁崇山阻江為險水土惡劣瘴癘時行若

欲直搗巢穴恐曠日持久得不償失如猛犛果傾心懷懼願效臣服似即可宥其前愆酌與自新之路得旨另有旨諭軍機大臣等據楊應琚等奏節次剿殺緬匪幾及萬人見在緬甸等懇請罷兵歸順並稱若欲直搗巢穴轉恐曠日持久得不償失似可宥其已往之愆等語所奏似未協機宜該督既奏節次剿殺緬匪多至萬人我兵見在奮勇直前軍威大振緬匪望風懾伏使果係確切情形則實有可乘之會正當厚集兵力因勢深入不難迅奏膚功何以復稱地險瘴多轉欲將就了事正恐該督等止據領兵將弁呈報不無緣營舊習虛張粉飾之弊其前後所報剿殺克捷之處俱未盡可信而緬匪負隅憑險勢難遽與爭鋒果爾亦當將該處實情奏明候朕酌度西師一事運籌決勝一切皆斷自朕衷但從前準夷回部地勢人情皆所洞悉故得隨宜指示督令直前鼓勇

耳今緬匪地隔邊隅勢難遙度而綠旗之兵力又非滿兵可比若該督奏報稍有未實其何以籌畫奏績耶故此事原令該督相機酌辦朕亦並無成見前此屢降諭旨甚明該督既身任其事休戚誼同一體更無庸稍涉虛浮猶之一家之事彼此分理而仰家長爲主持又何所疑慮而不以實告耶前遣侍衛福靈安帶領御醫往視楊應琚病勢計此時將抵永昌福靈安本係侍衛出兵之事職所應爲且前此平定回部時曾隨軍營有年軍務素所諳習若已離永昌則亦可以不必若尚在永昌著就近馳往軍前詳悉體察如見有可乘之勢不過一月半月可以得彼處要害城池福靈安卽不妨同往統兵進剿如該處勢難籌辦伊卽可一面據實詳悉入奏一面回京朕亦得知微外確情以定進止至福靈安此行與該處進兵本屬兩事楊應琚係公忠體國大臣所見素爲正大

諒必不因有此旨稍存觀望推諉也又楊廷璋另摺所奏先示之
威信豫爲陳說之處想楊應琚前此業經辦及如尙未籌畫到此
則楊廷璋到永昌後二人不妨從長面商妥協行之至楊應琚見
在病勢日漸向愈精神亦漸能復舊即可無需助理楊廷璋到後
恐一省兩督調度事宜不能無絲毫同異在該督等均屬重寄彼
此必不稍存意見但恐屬員等不免窺測疑揣或致無所適從於
事轉屬無益况兩廣事務亦屬緊要楊廷璋接到諭旨後可卽仍
回粵東楊應琚於進剿緬匪一事始終經理責成旣專自更易於
集事若楊應琚尙宜調攝數日楊廷璋卽再住數日幫辦亦無不
可再見在進剿之事及楊應琚病體刻廬朕懷此次奏報殊覺遲
滯嗣後如遇打仗得勝緊要事件不拘三日五日俱當隨時加緊
馳奏卽軍營尋常光景及該督就愈情狀亦當十日一奏以紓遠

念發去孔雀翎五支藍翎十支交與該督察看實在出力將弁酌量賞戴用示鼓勵著將此傳諭楊應琚楊廷璋及福靈安知之○辛巳諭期成額定長奏審訊知府李拔所稟員金賄託各情不察虛實輒行稟告請交部嚴加議處並訊出張安燧代熊學騏員金及張何衡等探信各情由請分別辦理等語李拔原稟止係密送宮兆麟經宮兆麟呈出始行逐一研究並非竟向期成額等捏詞誣控是其所稟雖未盡實轉不必以此加罪其張何衡吳世賢之探聽亦屬外省常有之事均無庸交部熊學騏令屬員買金並短發價銀實屬有罪著革職交部嚴議具奏○諭軍機大臣等駁成額等查審馮其柘彌補虧空一案分別擬罪之處已批三法司駁擬具奏矣此案李因培赫昇額授意屬員以致展轉那移巧爲彌補實出情理之外巡撫爲封疆大臣藩司係錢糧總匯一省之整

飭稽察惟於撫藩是寄乃伊等竟敢上下扶同徇情蒙蔽充其伎倆將何事不可爲是伊等之罪實在於有心欺罔較之監守自盜更爲重大今期成額等以赫昇額依侵盜錢糧一千兩以上律問擬斬候於情罪既不相符而牽引侵盜錢糧律文轉似故爲周內亦不足服赫昇額之心赫昇額不必就此案完結李因培前已降旨拏解湖北質審俟解到後與赫昇額質對明確卽照此旨定擬再行具奏並將諭旨敘入摺內可傳諭期成額定長知之○壬午諭據期成額等查審馮其柘虧空至二萬餘兩之多李因培授意張宏燧代爲彌縫報少及赫昇額令屬員幫同彌補一案飭法營私實出情理之外州縣虧空本有應得之罪若私自通同幫補既使劣員倖逃法網且必復貽累他人效尤侵蝕弊將無所底止深可痛恨上年山西段成功虧帑累累各屬幫銀填補業經大加懲

創不料未及一年湖南復有此案可見外間上下扶同之習固結不解各省皆然吏治尙可問乎從前州縣侵虧那掩之弊錮習相沿經 皇考御極嚴加整頓始得肅清朕方謂謹守成規即可臻大法小廉之治而刑罰世輕世重張弛互用道亦宜然不意近年藐法欺蒙之案屢懲屢犯此未必非因朕三十年來水弱易玩所致如此則不得不力爲整飭朕亦非不能振綱飭紀者也督撫爲封疆大臣藩司爲錢糧總匯一省之察吏糾貪乃其專責如遇屬員侵虧帑項據實參劾則屬員自必共知顧忌何難使諸弊激清况督撫等皆朕所簡畀深加倚任之人亦何忽不共勵天良力持公正而乃專事彌縫通同徇隱甘蹈欺罔重罪而不辭是使朕竟無一可信之大臣亦伊等不能承受朕恩享安靜無事之福也試思督撫膺高爵厚祿待之不爲不優而幸際昇平並無折衝宣力

之事宴然坐享豐盈其稍可自效者不過正己率屬共矢潔清乃
尙不思殫竭丹誠秉公盡職又安用此督撫爲哉見在已經發覺
之案如此則各省之匿而未發者大略相同非朕之必欲逆詐億
不信實伊等甘於自欺致不見信於朕耳此等貪黷欺蒙之輩天
道昭彰無不自然敗露隨時嚴治未嘗不可肅國典而儆官邪然
與其犯而後懲莫若先爲明切申戒著傳諭各督撫卽就所轄屬
員內通行查察將有無虧空據實保奏計伊等此次覆奏亦未必
遽肯和盤托出卽如前此查覆首邑賠墊一事明知其未可盡信
朕惟將各摺批交該部以待將來證驗此次各省所奏實與不實
朕仍姑不深究奏牘旣陳禍福惟聽其自取將來或別經犯案惟
於覆奏之該督撫是問無謂朕言之不豫也嗣後並著於年終將
屬員有無虧空之處彙奏一次以重責成著爲令並將此通諭中

外知之○諭軍機大臣等期成額等奏審訊馮其柘虧空情節及李因培赫昇額授意張宏燧代爲彌補竟與山西段成功之案事同一類實出意料之外其稱李因培於張宏燧清查稟覆時告伊虧空太多汝係能辦事之人好好去辦我也不用細說等語於緊要處槩付以隱躍含糊全不成話此非當日實在情節難以憑信至赫昇額令各屬員幫同彌補巡撫斷無不知之理其事或係李因培未調任之先或在常鈞接任之後何以並置不問李因培之爲人平日好任機智立崖岸又豈肯隨波逐流與人分過卽以常鈞之遇事頗預亦未必懵懂若此而謂李因培竟甘受屬員愚弄而不顧其誰信之若云因通省倉庫錢糧業經題保無虧恐盡數指參致受奏報不實之咎較伊見在所得罪愆孰輕孰重李因培又豈不知審度決擇何至昧昧然自貽他日之累乎此皆情理所

必無豈足以成信讞試問定長設遇此等虧空之案肯無故曲爲掩蓋致日後發覺因人獲罪乎看來李因培與馮其柘若非別有關切隱情必不肯無端徇情開脫此中關鍵豈可不切實根究將來李因培到案時著逐一嚴行究詰務得確切實情勿少任其狡詞飾混期成額定長如意圖將就完案稍有不實不盡之處朕或另派大臣復往查訊恐伊等不能當此罪也○己丑子原任工部侍郎范璨祭○庚寅諭朕巡幸天津周覽河隄淀閘指示機宜永求畿輔民生利賴翠華臨莅宜沛恩施所有經過地方及天津閩府所屬本年應徵錢糧著加恩蠲免十分之三以昭乘春布澤之意○楊應琚等奏據總兵朱崙等稟報緬酋猛毒之弟卜坑及領兵頭目莽聶眇遮屢赴軍營乞降據稱前因蠻蕃及各土司近年貢獻逾期率眾索取原非抗拒大兵今已屢被懲創情願息兵歸

順至蠻暮新街等處實係夷人資生之路並懇賞給貿易批如此則前此受降之事何以完結且能保我兵旣撤彼不誅夷此二處乎又批緬甸亦一大部落彼若乞降富有國王之表同安南暹羅之例或可將就了事然亦必將蠻暮新街獻於中國方可又奏臣等隨飭朱崙傳喚卜坑等詰以猛毒狡詐難信如果畏服當先撤兵輸誠旋據莽聶眇遮等報於十二月二十八日已將匪眾遣散見在委員前往確查得旨另有旨諭此奏大不安前已有旨此更繼爲嘗試而來非公忠體國與朕同心大臣之所爲大不是矣甯不想病後朕所加恩乎諭軍機大臣等楊應琚等奏緬匪屢次乞降並懇請將蠻暮新街等處賞給貿易見在酌辦一摺所奏大不是已於摺內批示矣前據該督以木邦蠻暮相率歸誠已得緬甸要隘請乘機辦理朕以該督素稱厯練必非輕率喜事者因令其

審勢熟籌以定行止續經該督親往受降自必操成算於胸中豫
定善後之計故爾勇往直前並非朕意存成見必令該督如此舉
動也昨據該督節次奏報剿殺萬人軍威大振又稱地險瘴多得
不償失前後已自相矛盾如果我武既揚賊匪膽落何難乘勢長
驅膚功迅奏而轉爲畏怯不前之語恐所奏非該處實情業經傳
諭明切指示今復據奏緬目願遣散兵眾請賞給蠻暮新街照常
貿易是緬匪名爲乞降實不過暫退其眾且欲得其故地此等狡
詐伎倆其將誰欺而該督遂甘受其愚據以入告可見所奏全非
實在情形不過粉飾虛詞藉此以撤兵了局耳試思緬夷亦大部
落如寶係誠心乞降願附屬國其酋自當請罪納款具奏輸誠效
安南暹羅之通職貢奉正朔並將蠻暮新街呈獻中國尙可將就
了事朕亦無求多於荒服之心卽或事屬難圖亦當將該地見在

情勢據實奏聞候朕酌量定奪今率據綠營將弁捏詞稟報以匪目遣散兵眾爲得意輒欲還其歸附之地息事苟安尙復成何事體豈該督辦理初意卽思如此草率完局獨不計蠻暮新街等處旣已納降並遵定制薙髮卽成內地版圖今若准其貿易則其地仍歸緬匪楊應琚能保此數處人眾不遭緬匪荼毒乎且蠻暮而外尙有木邦整欠整賣等處前此懇求內附時並請我兵保護今該督亦置之不言是緬匪旣得蠻暮則木邦等處亦將悉還之而聽其戕賊乎如此則幾視受降如兒戲何以靖遠夷而尊國體設因緬匪兵眾旣散遽將我兵撤回致有貽誤則伊等之錯謬更不可問矣至於就事完事乃向來督撫等頗預陋習此施之地方政務尙且不可況邊徼用兵何等重事而亦欲圖聊且塞責耶楊應琚尙屬公忠體國大臣乃竟屢以空言嘗試頗不類其平日所爲

豈伊病體尙未痊愈調度不能自主或出自湯聘李時升等從旁
恣通楊應琚亦遂附和苟同故爲此奏耶且李時升以提督統兵
之人何未一臨陣而止聽一副將之報遂欲將就了事乎楊應琚
若神志不昏則無論朕素日倚重之恩不當稍存欺飾卽其患病
以來朕日夜繫思賜醫賜藥體恤存問何等優渥楊應琚竊不知
感激奮勉實心妥辦以副朕懷而所奏乃出意料之外實非所以
報答朕之逾格恩施矣著速傳諭楊應琚等就該處實在情形妥
協經理仍速將見在光景如何切實馳奏楊廷璋此時或尙在永
昌未經回粵並著會同確商籌辦務期妥善將此一併傳諭知之
○辛卯諭雲南永昌府見有辦理事件著楊甯卽速馳驛前往○
諭軍機大臣等昨楊應琚等奏緬匪請將盤暮新街等處賞給獎
賞等因一摺所見實大不是已有旨詳悉飭諭矣今復細思此事

楊應琚等辦理既已不得竊要恐其中茫無主持調度機宜必致
日益歧誤於事大有關係且將來籌畫安辦朕仍不能他諉若俟
其僨事而後爲整理則須另起爐錘不若此時覈實斟酌審機集
事之爲愈因復明白諄諭使其知所猛省不墮迷途從前辦理緬
匪之初原因莽逆召散竄入彼處向其索取若緬酋將召散獻出
原無事多求旣而該督以蠻暮木邦等處相率投誠請中國發兵
保護爲奏朕彼時原以緬甸僻在荒陬其事亦不值一辦並未嘗
有興師勦遠之意因思該督閱歷有年必非輕率喜事者故諭令
量勢熟籌以定進止該督自當慎之於始如木邦等處實因彼等
眾心畔散窘急來歸固可就其已渙之勢設法招徠使其自成瓦
解然亦應計及受降以後如何撫馭綏靖禦其外患俾之永隸版
圖若其閒稍慮有棘手之事原無妨拒而不納此所謂可行則行

可止則止之要領也乃該督輒前往親受其降朕以該督既如此
勇往自必胸有成算此後諸事皆無難迎刃而解方嘉該督之實
心體國冀奏膚功以加渥賚及緬匪率眾至蠻暮騷擾以業經歸
附之疆自不可聽其蹂躪既已發兵進剿卽當盡殲賊眾以衛此
降蠻迨新街小挫因致退兵益當策勵士眾奮勇前進以揚我武
乃遽聽其頭目一語謂彼酋長乞降轉請給還已附之地遂欲將
就了局方在交鋒之際並未制勝克捷遽思歇手尙復成何事體
朕辦理庶務從不稍任顛預完事况用兵邊徼乎試思我大清
國全盛之勢何事不可爲卽如前此西師之役平準夷定回部在
行間者未嘗不經歷艱險終成大功皆由我國家將士同心效忠
有進無退所致蓋爾小醜有何足畏遂欲半途而廢甯不慮見輕
於外夷楊應琚卽宋身親軍旅前在陝甘總督任內西陲肅定一

事朕如何運籌指示豈竟毫無見聞乎至見在調集之兵一萬四千有餘兵力不爲不盛更不當稍存畏阻乃伊等自新街一戰卽退回楞木而兩次所報交兵之地又止稱銅壁關鐵壁關以外按圖而計楞木已在新街之內兩關則並退至我界內矣而該督所奏屢次殺賊萬餘究在何地及如何禦戰剿殺之處並未詳晰聲敘則其所謂得勝仍不過綠營虛誇粉飾惡習必不能出朕所料設果如伊等所云緬匪此次挾以侵擾蠻喜新街之眾前奏止有二萬若殺至萬餘則已去其大半賊匪甯不膽落奔逃尙敢擁眾相拒而此次猶以遺散賊眾爲詞則前後奏報之不足信益顯然矣又如莽聶眇遮等既有詣軍營乞降之說楊應琚見在病中卽不能親往查詢李時升所司何事亦豈不可親至軍營察其誠僞而率委之總兵朱崙任其處分朱崙又不親見匪目復委之參將

哈國興出營傳諭此何等事而該提鎮輕忽若此有是理乎且李時升身爲提督統兵乃其專責見在駐守何處何未聞其親歷行陣督率進兵以張軍聲而作士氣而總兵華封劉德成又在何處何以止令朱崙烏勒登額分兵守勦於華封等總不提及且就地圍覈其形勢新街止水路要隘尙有木邦等東中兩路可通阿瓦城又何以不派華封等往彼相機辦理以成犄角之勢令其首尾不能相顧耶况辦理緬匪本因索取召散而該督自主歲夏秋以來於內地如何往索及緬匪如何答覆擒獻與否之處總未一語奏及務末而忘其本又安能得事之肯綮乎總之此事旣已辦理斷不能如伊等所奏爲草率苟且之計卽此時瘴癘漸發我眾未可冒涉亦當俟秋深瘴退之後另籌分路進勦搗其巢穴一舉而殲滅之使蠻荒永靖方台正理若楊應琚實見有必不可辦之處

朕亦非欲必窮兵黷武但業經選調兵馬征勦緬甸眾所共知豈能遽爾無端中止此事實楊應琚始終經理因何圖昧舛謬若此伊實不能辭其責以楊應琚平素老成歷練實不類其所爲或伊赴滇時本係病後神志昏憤一切不能自主誤聽線營將弁誑飾怨愆遂致辦理貽誤亦未可定則當據實陳奏誤聽之實故懇請重治其罪並卽嚴參其誤事起釁之人朕亦當明降諭旨以朕誤聽楊應琚之言辦理緬匪之失布告天下且謝朕用人不當之過庶可罷兵歲事朕此次開誠訓諭楊應琚當知感激自勵盡布悃誠毋得稍有隱飾以速愆戾至前寄去孔雀翎藍翎令其察看實在出力將弁賞戴以示鼓勵從前西陲用兵亦係如此但彼時皆我領兵大臣目擊將士等殺賊立功並有實蹟可據故賞罰明而人心益奮今觀楊應琚等節次奏報率屬虛詞恐其功績未能悉

當若不過止給巧於飾對之總兵副將各員戴用以圖誇耀則濫
賞冒功其咎更大亦非朕獎勵本意矣又昨奏摺內有弄種止丹
等地名皆前圖所無著另行詳悉繪圖呈覽此後或駐兵戰勝之
處其地名有圖所未備者即將附近圖內何地之處隨時聲明以
備披覈將此卽速傳諭知之又諭楊應琚等辦理竊匪之事種種
舛謬之處已降旨明切飭示由六百里加緊馳諭矣茲復按閱地
圖再四審度愈覺該督等前後所辦其大不是實出情理之外不
勝憤懣該督前奏蠻蕃等投誠時已令薙髮留辮並將我兵駐紮
新街占據地勢則此兩處皆爲中國版宇而兩處降附之人卽同
內地人民自當加意守護扼其險要以爲進兵之地前此新街小
挫尙意其不過偶然失事我兵仍駐守其地以圖勦賊而其後乃
稱退至楊木漸且銅壁鐵壁二關今按圖詳閱楊木距新街已隔

猛英高里兩土司之地而二關則並在我界內我兵旣已退回則是蠻蕃新街早已棄而不守其兩路地方見在作何著落降附之人或盡爲緬匪戕害或復爲緬匪脅從該督屢次奏摺總無一語提及若此兩處尙隸內地何以不照前在彼駐兵轉退至楞木以內設仍爲緬匪侵占其地已復爲賊有又何以有請賞給貿易之語矛盾支離殊不可解又如該督兩次所奏殺賊萬餘是我兵威業已大振縱不能卽乘勝直入深擄賊巢亦當及此克捷先聲復進據蠻蕃新街搜逐賊匪更不應退回內地矣看來該督邇日所奏皆係聽信綠營粉飾全非實情卽從前所稱受降諸事亦不過詭語鋪張希圖聳聽今則破綻自露雖欲掩飾而不能盡掩豈公忠體國大臣所宜出此乎再從前投誠之眾如整賣景線景海等處俱經該督奏請賞給職銜已允所請交部發鈔又中外所共知

者此等人地見在作何光景該督亦未籌及今於蠻彝新街之事
謬誤若此若整賣等處緬匪又復效尤肆擾該督等亦將置之不
顧耶至李時升前來陛見尙覺奮勉妥練是以將伊調任滇省提
督冀其出力報效乃伊到滇以來並未聞其親至軍營督率士卒
奮勉進剿至今不知其逍遙何地身爲統兵大員如此養尊處優
玩忽從事是不能永受朕恩亦必如達啓之自取愆尤矣再從前
湯聘等參奏趙宏榜在新街輕進失事復將傷病官兵器仗收入
草屋放火焚燒退回內地請將伊革職治罪彼時以趙宏榜如果
係輕進則尙係勇往向前猶可原諒但恐輕進之語亦未可盡信
是以諭令該督等確查具奏另辦迄今數月何以尙未奏及不知
伊等在彼所辦何事前因該督聞信卽往永昌似屬實心爲國出
力是以傳諭嘉獎賞賚並欲待以酬庸渥典由今以觀則其前此

所奏不過文飾敷衍毫無實際既受朕恩褒便欲將就了事其視朕爲何如主此等伎倆竟能巧爲嘗試乎見已諭令據實覆奏且俟奏到再行定奪著將此嚴切傳諭知之○以故郡王品級貝勒玉素布之子伊勒巴喇伊木隨父入覲卒於途加賞銀五百兩俟喪回哈密再賞銀五百兩賜奠○癸巳諭軍機大臣等昨因提督李時升身爲統兵大員並不親赴軍營督辦一味玩忽因循不堪復膺專閫之寄是以降旨革職留滇效力贖罪適楊甯陞見卽將伊補授雲南提督並令其馳驛前往代李時升任事朕之所以簡用楊甯者以前此西陲用兵時伊曾隨歷行閒身經戰陣衝鋒殺賊之事素所諳習必不至如達啓李時升輩之畏葸不前且伊身係滿洲亦斷不肯效綠營虛誑惡習是其實心出力乃所優爲朕之期望於彼者亦不過如此頃曾面諭及之至軍營一應調度機

宜則係楊應琚專責切不可稍存觀望况楊甯之職止在督兵勦賊而其可倚又在誠實不欺若運籌決勝原非所嫻朕並未以此相委寄卽楊應琚始終經理緬匪一事功過惟獨任之此時更不得妄思推諉也此事初辦時朕實毫無成見因該督屢奏有可乘之機朕以該督素爲厯練必不至輕率喜功且必胸有成算方待其建績策勳不意該督前後所辦竟爲緣營將弁所誑病昏不察信以爲眞而李時升憚於親往旣爲其下所愚復轉以愚該督而該督又輕據若輩粉飾虛詞率爾入告朕亦誤聽楊應琚之言爲所蒙混今見其諸未妥協因綜其始末詳覈熟籌始知該督種種謬妄至此乃水落石出而其最甚者如兩次所報殺賊一萬有餘尤爲荒誕夫殺賊果至盈萬則填屍流血其占蔽地面當復不小伊等果能悉數其戰勝之處乎且該督等前奏自新街小挫卽退

回楞木似蠻暮新街皆已棄而不守若斬獲果真則兵威大振先聲所布何事不可爲縱未能乘勝深入直搗賊巢而奮我銳氣逐北追奔無難徑抵蠻暮新街拔戮匪徒收復故地何未聞伊等仍至彼兩處駐一兵殺一賊乎且從前平定準噶爾回部征勦邊除不下百餘戰統計所戮尙不及萬人乃謂兩次交鋒俄頃之間方隅之地竟能殺賊如許有是理乎楊應琚辨此一事旣已誤之於前此後不宜再誤屢次所降諭旨甚明况辦理緬匪一節楊應琚旣已承擔其任卽與朕誼同一體更不容稍有欺隱如該督果見其勢有難行卽遵前旨據實陳奏亦可另爲裁奪若欲如前奏之虛蒙文飾便圖顛預了事楊應琚其何以對朕而朕亦何以對天下豈朕平日所倚任爲公忠體國之大臣可出此耶至該督前此之誤原因病軀不能親至軍營而李時升亦不往惟任將弁等捏

詞愚弄今楊甯至彼自可得該處實在情形不特朕可灼知萬里以外卽楊應琚深悉實情亦可相機妥辦期收效於桑榆於彼實有裨益但恐外省陋習妄疑專道大員馳赴軍營必倚其主持經畫則大不然無論楊應琚至此難以卸責卽朕或以楊應琚爲不可復用何難另簡督臣往代而專派一提督以掣其肘乎楊應琚若誤會朕意略有瞻顧諉謝之心則是自速重愆矣著明白傳諭卽令楊甯齋往諭令該督知之

二月乙未朔諭軍機大臣等福靈安奏據御醫李彭年診視楊應琚病勢尙未痊愈等語是楊應琚等節次所奏辦理緬匪種種錯誤之處皆因該督病中神志恍惚不能主持致聽將弁捏飾誑報之詞復爲李時升等所愚遠爾入告否則楊應琚平昔頗爲歷練老成何前此擔任勇往忽圖草率完結耶見在征勦緬匪關係緊

要楊應琚病旣未痊惟爲眾所欺哄經理恐難妥協伊子楊重英向來尙屬明幹任事不失世家舊族之風著卽令其馳驛迅往永昌省視伊父並勦助一切軍務楊應琚復得一子在側病體自更易就痊且調度有未當之處伊子亦可從旁代爲籌畫於公事自屬有益並可令其隨楊甯前往軍營倣古來監軍之意協同辦事則彼處實在情形楊重英皆得備知可以轉告伊父並可一面據實奏聞從前楊應琚因病軀未能親莅行閱邊外確情未經目擊故領兵將弁得而蒙蔽之遂致有捏報殺賊萬餘荒唐不可信之語然在旁人或可粉飾虛詞以欺楊應琚致楊應琚誤信亦以飾詞妄奏今楊重英親往斷不肯稍欺其父亦復不肯更欺朕以致其父仍蹈前此虛謬之愆卽朕亦得灼知聞外切實情形得以指示裁度諒楊重英所奏必不肯稍涉虛浮也所有前後寄信楊應

琚諭旨並著鈔寄楊重英閱看伊見在江蘇著傳諭明德接到此旨卽令其迅速前往所有江蘇按察使員缺著明德另委妥員暫行署理並將此寄諭楊應琚知之○丙申諭前因開館續纂文獻通考一書並添輯本朝一切典制分門進呈朕親加披覽隨時裁定全書見在告竣經該總裁等奏請將館務停止因思馬端臨通考原踵杜佑通典鄭樵通志而作三書實相輔而行不可偏廢曩因舊本多譌曾命儒臣詳爲校勘鐫刻流傳嘉惠海內今續通考復因王圻舊本改訂增修惟通典通志尙未議及補輯士林未免抱闕如之憾著仍行開館一體編輯所有開館事宜著大學士詳悉定議具奏其修書義例有應仍應改之處該總裁等務博稽前典參酌時宜而要之以紀實無譌可垂久遠至見輯續通考一書從前所進各門僅載至乾隆二十五年以前而陸續呈進者並纂

入三十一年之事先後體制尙未盡一著交新開書館將所纂二十四考彙行增輯編載事實悉以本年爲準增添各卷卽速繕呈覽以便刊板頒行其通典通志二書亦以三十一年爲限以期畫一至於朕之敕修諸書固以闡往開來備乙覽而牖後學亦使詞館諸臣得效編摩之職且於常俸以外復叨月給餐錢用示朕體恤之惠承辦各員自當悉心蒐考無漏無譌以期完善所有節次繕進各書皆經朕詳加釐定其閒字句差謬及文義錯謬者卽爲指示改正不一而足諸編纂者亦當知愧改過實心校錄矣而茲閱輿地考內所載南海子一條言自萬泉莊匯注於此試思萬泉莊水勢南高北下從清河一帶迤邐通行卽有涓流旁溢亦當入長河以達會通與南海子無涉而該纂修竟以旁近之萬泉寺誤爲萬泉莊此係目前易考之地何以不加詳覈疏略若此著將該

纂修交部議處嗣後在館諸臣務益加意參稽勿得率爾操觚致貽譌謬以副朕典學右文之意○丁酉諭據期成額等究訊馮其柘等供出虧空緣由實係李因培與赫昇額商令張宏燧代爲彌補扶同欺飾一摺是李因培心存欺罔巧爲授意已無疑義因檢閱赫昇額供詞據稱馮其柘虧空事發時卽往見李因培李因培向言馮其柘虧空倉庫二萬多兩其倉穀一項卽缺一萬幾千我纔保題通省倉穀無虧如何辦得出去遂與赫昇額相商令張宏燧設法辦理而張宏燧則供稱李因培傳我進見說錫爾達並不上省面稟卽將馮其柘虧空如此通揭混關爾往見藩司卽往武陵妥辦及張宏燧查辦後與錫爾達先後回省錫爾達又續揭馮其柘署龍陽縣任內虧空五千餘兩李因培傳張宏燧面言近日焉有如此大虧空必致有欵差查辦倉穀虧缺仍舊要出來須辦

小些纔好當時李因培還要尋別事參錫爾達令圖明阿查伊庫
項並訪其款蹟各等語其於李因培神情口吻歷歷如繪自屬實
在情形李因培身爲巡撫察吏是其專責乃聞知府揭報屬員虧
空不卽據實糾參轉因其不先面稟遽行通揭爲嫌欲圖尋事參
劾而於劣員虧空授意屬吏設法彌縫諱多作少上下扶同希圖
蒙混其居心險詐敢於罔上行私已足定其罪案其餘情弊雖不
可不徹底根究然亦未必更浮於此李因培並非昏庸無識之人
其於利害輕重豈不自知決擇卽云甫經題報倉穀無虧恐馮其
柘虧空太多欲圖掩飾甯不思彼時卽按實情參出雖亦有應得
處分不過止於失察及查報不實之咎其事尙屬因公豈若此之
有心欺飾情無可恕乎而李因培正以此獲譴較和其衷受段成
功之賄而曲爲庇護者其情更不可解必係李因培平素處心積

慮隱微多不可問爲天理所不容故令其自取重愆展轉敗露報應昭然不可爲炯戒乎至錫爾達揭報屬員虧空絲毫無隱爲上司者方當獎其持正且幸得一實心伙助之員共襄廉法豈可因其不先請示轉嫉之如仇意圖尋隙洩忿卽此已見其心術不端看來此等惡習未必創自李因培或伊久任外差習見各省風氣如此遂爾效尤滋甚亦未可定但未經發覺朕亦不肯輕爲逆億故復明切訓誡朕辦理庶務一秉至公從不豫設成見而於大小臣工悉推誠相待惟冀多得一公忠體國之人乃督撫等尙不知實心圖報朕常深味爲君難之言卽知人任用亦其大端矣至封疆大吏坐享高爵重祿且受朕尙任厚恩若自昧天良忍於欺隱上君必誅其心而奪其魄使之自撻法網李因培車鑒具在督撫等不可不痛自猛省復蹈覆轍也錫爾達揭報漏其柘虧空不願

上司情面甚屬可靠著該部調取來京引見期成額等摺並發並
將此通諭中外知之○己亥 上御經筵○幸莊親王允祿第視
疾○壬寅諭軍機大臣等楊應琚屢次所奏殺賊盈萬及緬酋乞
降欲圖將就了事種種外誤不一而足業經節降諭旨明白開示
嚴飭訓戒矣茲據奏稱查緬匪反覆不常應豫集兵馬俟春夏瘴
過進剿以期永靖南服等語已於摺內詳悉明示該督此次摺奏
較前稍覺醒悟是其近日病勢漸次就痊神志不復似從前昏憤
果爾則伊自當略得主見於情事虛實勦捕機宜必悉心參酌籌
畫以正向來之謬以贖前愆實亦朕所深願辦理緬匪一事朕初
無成見以該督謂有可乘之機遂聽其籌辦不意該督自受降以
後茫無主持日就差錯至連次所奏愈覺失枝脫節則底裏已畢
露矣看來該督初辦時必係誤聽趙宏榜之言未免稍涉喜事不

復通盤籌算遽謂可指日奏功及見新街小挫事稍棘手以致惶愧成疾而朱崙遂乘該督病中警戒又見阿穆呼朗病亡因詭捏虛詞誇張報捷以逞綠營欺詐伎倆楊應琚當風痰迷眩之後不復能細加體察信以爲真湯聘李時升等見朕軫念楊應琚病勢優渥加恩便思趁此機會急圖結局楊應琚爲伊等慫恿亦竟不能自主遂欲將錯就錯草率告竣伊等隱微若揭實不能逃朕之洞鑒也殊不知朕之所以加恩楊應琚者原因其爲國家出力且此事始終係伊經手恐其因病貽誤故速冀其痊以期於事有濟若以恩眷加隆卽圖恃以息事試思朕辦理庶務從不肯聽其顛預完案况邊陲軍務何等重大豈有因優恤大臣之故遽爾中止乎緬甸爲南荒僻壤並未嘗必欲加兵此與從前籌辦準噶爾回部之不得不勦平者情事有閒但蠻蕃木邦等眾旣已相率歸誠

隸我土宇早爲眾所共知且就伊等退兵情形而計似蠻暮新街亦皆得而復失豈可竟置之度外該督此時若能嚴飭將士奮勇進兵仍將蠻暮新街收復驅殺賊眾撫輯降蠻使我軍威大振緬酋或聞而驚怖悔過輸誠並將召散擒獻未始不可予以自新若因其頭目乞降一語遽思乘勢撤兵其何以申國憲而靖蠻服卽伊等此時含混歇手又甯不慮將來之不無後患自貽伊戚耶至歷次朱崙所報殺賊萬餘之語實爲荒唐不可信夫殺賊盈萬其勢甚大非復尋常之捷遠近傳聞必皆如風聲鶴唳驚而卻走何有此區區賊眾尙爾擁聚不退敢冒鋒鏑之理且朱崙並未親歷行陣率眾力戰是其畏怯較之趙宏榜更甚該督何以始終甘受其欺不據實嚴參治罪耶又所稱差員查探實情未據回覆更不成話此等軍營要務楊應琚卽因病後不能親往李時升乃提督

大員統兵是其事實何以亦憚於親赴該處確覈形勢督辦前既
爲將弁等所誑惑至此仍復委之屬員往查又安保其不扶同蒙
混是終不得其要領也該提督以專閫之人竟若身處局外所司
何事至請將趙宏榜賞給都司職銜效力之處更屬非是前因湯
聘等劾奏趙宏榜藐敵輕進致損官兵請將伊治罪彼時以趙宏
榜如止係輕進則尙知臨敵勇往情稍可原是以令該督等查奏
今旣據查非畏葸遁逃自可貸其軍律但甫經獲譴革職之員卽
云熟悉邊情亦止應令其赴軍前奮勉立功以圖自贖如果能實
心出力克復蠻寨新街卽仍授以副將亦未爲不可若此時並未
曾稍著勞績豈可遽請給銜示獎乎楊廷璋旣經回粵此事全係
該督責成朕如此推誠開導該督亦當幡然猛省務宜妥協籌辦
仍將確實情形奏聞毋得仍蹈故轍自取罪戾也將此傳諭知之

○諭據楊廷璋奏見在楊應琚痰疾已愈卽由雲南回粵等語已於摺內批示矣看來楊廷璋不過以此事難於辦理因卽遄回粵省其畏難避事之意已見於言表但兩廣事務亦關緊要督篆未便久懸且雲南一省兩督調度事宜或不能無絲毫同異恐轉致屬員無所適從於事亦屬無益楊廷璋此時既回粵省朕亦不深加責備至緬匪見在情形該督既與楊應琚會摺具奏有業已訪查另行籌辦之語則於將弁等之捏詞粉飾及楊應琚誤信人言辦理舛謬之處當已窺見端倪著卽將在永昌時所見所聞據實覆奏以備覈正如稍存模稜兩可之見故爲隱躍其詞希冀顛預了事則是自取罪愆見飭各處查奏實情斷不能終於掩飾將來水落石出該督豈能辭欺罔之咎乎可將此傳諭知之○以曹秀先爲內閣學士由祭酒遷○癸卯諭學政升任應否留任槩行請旨著

爲令○丙午定世職官員無人承襲給嫡婦半俸例○丁未楊應
璩等奏前因緬匪散眾乞降委員前往確查據查報猛卯邊外有
匪眾數千欲至木邦等處滋擾批如何向之所稱非欺而何又奏
臣李時升會同朱崙派撥官兵迎勦於正月十六日至十八日約
殺賊二千有餘追至底麻江賊眾浮水渡江計溺斃及槍礮傷死
又約二千餘餘俱過江逃遁打死賊馬五十九匹奪獲軍械無算
又批此等虛辭止可欺汝不能欺朕必無之事也又批四千餘賊
止五六十匹馬有是理乎又批緣營惡習實在可惡非正法一二
人伊等斷不知懼又奏此次官兵惟遊擊毛大經都司徐斌守備
高乾追抵江邊被賊回馬標傷陣亡臣等因緬匪既已乞降又復
率眾侵擾反覆背叛見在揀選將備仍飭朱崙親督官兵星馳進
勦得旨李時升總戎大員不身歷行陣惟稱調度豈伊自比於楊

應琚之運籌帷幄耶可笑可恨諭軍機大臣等據楊應琚奏猛卯
邊外匪眾數千欲至木邦滋擾經李時升會同朱崙派兵迎剿前
後殺賊四千有餘等語荒唐悖謬實出情理之外閱之不勝駭異
楊應琚前此輕信緣營誑語屢報殺賊萬餘早知其必係虛妄已
節次降旨明切訓飭今又奏稱殺賊四千有餘果爾是我軍威大
振賊當望風披靡何至遊擊毛大經等轉爲賊兵傷害其爲捏飾
欺罔尤屬顯然而前次所奏緬酋遣頭目乞降之語亦全係粉飾
捏報今復滋擾木邦何以楊應琚總視爲泛常之事又摺內稱李
時升會同朱崙派撥官兵星馳迎剿等語可見李時升自到滇後
總未一至軍營督勦卽朱崙始終亦從未統兵臨陣如此畏葸偷
安實堪髮指伊等身爲提鎮大員衝鋒打仗是其專職當此軍務
緊要之時乃僅派弁兵迎敵塞責仍不親往督率調度竟若置身

局外全不以事爲事玩律負恩莫此爲甚若不嚴加懲治何以使
凡隸戎行者知所儆懼李時升朱崙並著革職拏解來京交刑部
治罪至李時升朱崙如此怠玩事機該督何以視若尋常不行參
劾轉據伊等虛詞入告是誠何心而華封劉德成見在何處又何
以不令其領兵赴木邦勦賊摺內亦從未提及此二人殊不可解
楊應琚辦理此事前後錯謬之處屢經開導指示如該督福運未
盡當及早省悟遵旨據實妥辦尚可稍贖前愆或可仍前受朕恩
眷若再不知改悔甘爲將弁欺蒙致有貽誤則其取罪更大斷不
能曲爲原貸矣將此嚴切傳諭知之○己酉調鄂甯爲雲南巡撫
湯聘爲貴州巡撫方世儒爲湖南巡撫○以伍勒穆集爲理藩院
侍郎由內閣學士遷○庚戌諭軍機大臣等楊應琚等節次奏報捏飾謬
妄種種未協已屢降旨嚴飭矣茲復按圖校閱其閒舛謬不符之

處不一而足如上年九月趙宏榜帶兵駐紮新街已得緬甸要隘
卽猝遇賊人偶爾小挫亦當整兵拒守以待應援何至卽退回鐵
壁關內則不但蠻暮棄而不顧卽新街亦不能守矣而楞木自十
一月打仗之後亦不言及有無官兵駐守是我兵惟在銅壁鐵壁
二關以內此後並未聞有出關勦戰之事何以能殺賊多至萬餘
則其荒唐不足信更不待言矣且圖說聲明以藍綫爲界而前奏
所稱緬匪偷越蓋達及今次所奏至猛卯邊境二處皆在藍綫以
內而蓋達之外則有萬仞巨石等關隘猛卯相近則有虎踞天馬
二關何以容賊匪出入無忌且見在調集之兵已一萬四千有餘
縱不能統率大軍鼓勇進勦收復蠻暮新街等處而沿邊一帶緊
要關隘亦當分兵嚴密防守又豈得謬爲兵力不敷乃前此緬匪
至蓋達焚燒由何路偷越竟未聞稍有堵禦而此次至猛卯滋擾

我兵亦僅前往迎敵而非勦截則伊等惟株守銅壁鐵壁兩關而置其餘關隘皆一槩視如膜外當此軍務緊急之時邊防疏懈若此有是理乎又昨摺內稱賊眾欲從猛卯侵擾木邦緬匪向在鐵壁等關之西因何繞關而東得至猛卯其由何地竄入亦未據聲明至猛卯距木邦尙遠今賊兵既過底麻江而去則已偏近木邦華封劉德成覓在何處何以不飛檄兩鎮至木邦邀殺賊兵而僅云派兵尾追又於事何濟且底麻與宛頂相近烏勒登額既駐兵在彼又何以不聞率兵掩擊該督於一切喫緊關鍵均未能籌畫調度詳悉奏聞惟據朱崙等一切虛詞代爲轉報實所不解總由楊應琚病後神志昏憤甘受綠營將弁之欺而不悟其胸中全無主持已可槩見率是以往軍營其何由倚賴著將該督所進原圖照繪一分黏籤發去令其將諭旨詢問情節及圖內籤詰之處卽

速逐一明晰速行覆奏毋得再有支飾將此傳諭知之○辛亥楊應琚覆奏節次所報殺賊幾及萬人均經臣差人查覈又經李時升就近查明實係確情批此卽欺罔之一端又奏緬匪部眾繁多遇有殺傷卽隨時加添而永昌邊外十四土司延袤四千餘里山僻要隘在在均須防守見加調官兵七千餘名僅敷分遣如直搗賊巢仍恐兵分勢寡惟應鼓勵官兵奮勇扼要截殺又批旣分防要隘何以緬匪尙入內地又奏楊廷璋所奏先示威信豫爲陳說之處臣早經辦及該酋節次乞降府宣播天威曉以大義但該酋執迷不悟反視侵擾邊地爲得計又批旣執迷不悟何又節次乞降此等語句欺汝昏憤糊塗之楊應琚則可欺朕則不能也又奏該匪見已屢經敗衄懍懼更深已非前此情形可比似有可乘之機又批真是大言不慙可笑不謂楊應琚一至於此又奏臣見與

李時升揀選將弁仍飭朱崙由木邦一路進剿又批此二人誤事不小已有旨拏問速卽派人送京若至自戕汝當隨之又奏臣身受國恩乃以病軀刻廬聖懷近得御醫診視痰氣已清願勿以臣病爲念得旨不安之處不可枚舉大不是矣朕之過矣何不提起福靈安一句蓋汝恐彼到軍營將汝等欺罔處盡露耳此時汝先喪膽矣又另摺奏總兵朱崙統領軍務宣力爲多見又親督官兵追剿臣已宣示恩諭賞戴花翎得旨此當正法之人而汝與之花翎不知何意諭軍機大臣等楊應琚節次奏報辦理緬匪一事捏飾乖謬屢降旨嚴切飭責並令將該處情形查明據實覆奏尙冀其悔悟猛省不致終涉虛浮僨事獲譴今聞奏到之摺仍屬一派虛詞不意其竟忍於負朕厚恩甘蹈欺罔不顧實出情理之外不勝憤懣已於摺內逐一批抹嚴飭矣如所稱節次剿殺萬人此等

荒唐不可信之事朕豈能爲所蒙蔽而楊應琚尙覲顏屢以爲言
雖病後昏愼糊塗何竟昧心若此又稱添兵分防各處要隘果爾
則蓋達猛卯等邊境何以復容賊匪竄入而我兵並未聞有出境
勦殺之事其爲欺飾尤屬顯然至稱鼓勵官兵扼要截殺更不成
語試思伊等數月以來扼要者何地截殺者何時不過堅守銅壁
鐵壁二關並未能統兵出邊奮勇掩擊收回蠻幕新街二處所謂
鼓勵者又係何事是其頓兵不前畏葸退縮之情形畢露方爲賊
眾所輕肆其猖獗乃尙云欲使其懾我軍威紙上誑談竟恃以爲
得算有是理乎且旣稱緬酋屢次遣人詣軍營乞降何以又稱其
執迷不悟卽云緬匪反覆無常亦斷無一面乞降一面執迷之理
看來卽乞降之說亦是伊等粉飾虛詞而楊應琚竟言之鑿鑿不
自知其支離可笑此等緣營詐妄伎倆在楊應琚神志瞶惑自爾

恬不爲怪乃欲於朕前售其欺僞能乎不能至謂見在該匪喪亡日眾懷懼更深等語如此大言不慙不知楊應琚何以形之奏牘緬匪如果因喪亡懷懼則必勢窮力絀風鶴皆驚方奔潰之不暇又安能久聚邊境屢肆滋擾乎且所云賊眾約三萬餘遇有殺傷隨時加添之語尤屬荒誕此不過朱崙因前報殺賊萬餘而賊仍不減故飾爲此語希圖迴護前非耳緬匪近邊卽有十餘土司豈能調補如此之便楊應琚總深信前報殺賊之語一切槩不加詢察似此毫無見識軍務尙足倚賴乎至前發餉支原以鼓勵行閱實心出力之人若朱崙之畏怯不進捏詞欺罔獲罪重大所當立正刑章以示懲儆而楊應琚輒以花翎濫行賞給更不知其具何肺腸李時升朱崙前已降旨革職拏問此旨到後著卽將伊二人鎖拏選派妥員速行押解來京備途中管解疏虞致有自戕等事

恐楊應琚不能當其罪也計楊甯將到永昌提鎮事務不患無人接辦卽彼尙未到滇此時委人暫署亦無不可李時升朱崙二人在軍營原無濟於事此時卽將伊拏解於軍務毫無關輕重朕亦籌度及此楊應琚奉旨後更不必稍有遲疑也至前遣福靈安帶同御醫診視該督病勢旋復有旨令其就近體察軍務實情今福靈安已奏於祿豐縣接奉諭旨迅卽馳回永昌何楊應琚摺內並未提及一字蓋其意亦知事勢已涉虛妄難於掩蓋恐福靈安到彼底裏畢露此際遂爾神魂失據故作爲置之不論耳此次辦理緬匪一事專心委寄因其久任封疆素稱練達故爾深信不疑又因其從前尙屬黽勉任事優獎軫念格外加恩初不料其荒謬欺飾乃至於此朕於彼亦竟不能復有所期望且視其往後所辦若何禍福惟聽其自取摺內矛盾之處非批示所能盡著將此再行

明切嚴諭知之○乙卯諭和碩莊親王老成端謹懋著勤勞見在諸叔中年德最邵前聞抱病會親往問疾並擬於明晨再至邸第看視尙冀調理速痊遽聞薨逝深爲震悼卽於次日親臨奠醑並命皇四子皇十二子穿孝所有一切喪儀及飾終典禮各該衙門察例具奏以展朕篤念懿親至意尋予祭葬諡曰恪○以揆義爲江西布政使調吳虎炳爲江蘇按察使石禮嘉爲山西按察使以朱珪爲湖北按察使原任福建按察使○丙辰上詣莊親王允祿第賜奠○戊午改直隸州知州爲正五品○己未上啓鑾幸天津○癸亥上閱淀河

三月乙丑朔上閱子牙河隄○諭朕此次巡幸天津閱視淀河隄閘按圖披覽內有千里長隄之三灘里起至格淀隄莊兒頭止中間並無隄岸詢之該督稱向來未經辦理每遇淀水長發地畝

民居不無淹浸殊堪軫念本日朕閱看子牙河特命阿里衮分道往勘據稱無隄處所東西約長十餘里其中間有民修隄埝被水衝缺數處每當雨水過多之年村民一二千戶地畝千餘頃常被水患村民見有欽差前往踏勘築隄無不歡欣踴躍云從此子子孫孫皆可永遠霽恩且隄內之地亦可盡成膏腴實於居民有益等語從前修築格淀隄原爲捍衛村民今三灘里至莊兒頭十餘里獨無隄岸以資保障村民未免向隅著交與方觀承再行詳悉相度接築長隄卽覈實估計妥議具奏尋奏接築隄自文安縣屬之三灘里千里長隄起至大城縣屬之莊兒頭格淀隄止共長二千七百七十二丈頂寬一丈六尺底寬五丈酌就地勢高五六尺不等需用土方估銀六千九百五十兩零見飭大城文安二縣逐段興修務於汛前完竣仍飭該管之子牙河丞天津道往來督察

報聞○諭前年因莽匪滋擾劉藻辦理不善特用楊應琚爲雲貴
總督前往接辦彼時尙有木匪一案經常鈞具奏請俟剿滅莽匪
後再行辦及朕以此等邊外蠻觸原屬不成事體皆因吳達善劉
藻各任內不能實力查辦養癰貽患所致亦諭令一併辦理務使
悉絕根株以昭懲創爲永靖邊圉之計楊應琚到滇後莽匪業已
剿平不過經理疆界搜剿逸賊諸務嗣因莽匪召散逃入緬甸楊
應琚行文向彼索取並奏稱如彼不將逆首擒獻卽興問罪之師
朕以緬甸僻在荒陬從未敢侵犯內地其事亦不值興兵勤遠旋
據奏木邦蠻暮相率投誠朕以楊應琚久任封疆歷練有素必非
輕率喜事者比諭令酌審情形以定行止楊應琚自應將邊備夷
情通盤籌畫或木邦等實因緬酋殘暴眾心渙散窮蹙來歸固可
設法招徠使成瓦解之勢並當計及受降以後如何撫綏防禦俾

之永隸與圖不貽後患乃該督卽親往永昌受降且云機有可乘
不難籌辦朕謂該督必已操成算於胸中自能相機妥辦方嘉其
實心體國勇往任事隨卽加以獎諭並望其迅奏膚功以膺懋賞
不意該督自受降以後毫無調度新街雖已駐兵而一旅孤懸於
蠻蕃並無聲援犄角之勢所謂善後事宜安在這緬匪率眾侵擾
戎行前驅深入剋復蠻蕃新街以揚我武乃李時升朱崙節次退
回內地置新附地方於不顧而楊應琚見事稍棘手憂惶成疾朕
以該督爲國宣力忽染沈疴深爲軫念賜藥賜醫體恤倍至以冀
速痊而該督病後神志昏憤竟毫無主宰且又適當總兵阿穆呼
朗病故軍營重務惟委之朱崙一人李時升又不親自董率任其
逞綠營虛張粉飾惡習屢次誑報楊應琚竟甘受其愚漫不加察

惟知據稟轉奏全不見有運籌決勝機宜則是以辦理軍務之總督竟成軍營報事之人不甚可笑乎朕覽其屢次所奏殺賊一萬餘人卽疑其未必確實旋復據奏緬酋屢遣其頭目詣營乞降情願遣散兵眾懇請賞給蠻暮新街照常貿易且云地勢險惡進兵得不償失是該督始則冒昧貪功繼則欲圖苟且完事肺腑如揭而前此奏報殺賊之虛誑益復顯然因按所繪地圖詳加審度前後所奏種種乖謬不可枚舉因傳諭詢問該督卽如蠻暮新街等投誠時已令其遵制薙髮留辮卽成內地版圖自當扼其險要以爲進兵之地乃新街一挫遽爾退回鐵壁關內則是蠻暮新街早已棄而不守賊眾又何必復請賞給貿易似此支離荒誕其將誰欺且緬匪亦一大部落如果誠心乞降願附屬國其酋長自當請罪納款具稟輸誠效安南暹羅之通職貢奉正朔並將蠻暮新街

呈獻或尙可議及撤兵藏事乃率據綠營將弁捏詞謊報以匪目
遣散匪眾爲得計輒欲還其歸附之地且蠻驀而外尙有木邦整
欠整賣景線等處前此均准其內附設緬匪又復效尤滋擾該督
亦將置之不顧有是理乎又如前奏殺賊萬餘則是軍威大振縱
不能乘勝深入直搗賊巢亦當及此克捷先聲收復蠻驀新街搜
剿賊匪不應退回內地又伊等前奏賊眾二萬人如果剿殺萬餘
則業已殲滅大半羣賊甯不望風驚潰膽落奔逃又何敢糾合餘
燼偷越邊境肆其滋擾如果殺賊盈萬則我之兵威可謂大盛何
反讓地退兵又不知楊應琚何以深信不疑受其蒙蔽而不悟因
念該督病雖小愈而志氣未清致爲人所愚惑特明白開示令將
該處情形據實查奏卽果有難辦之處亦應切實奏聞候朕裁奪
今據覆奏仍屬虛詞而於事之關鍵總不明晰似此執迷不悟可

見該督之病憤無能矣至於賞罰嚴明尤行軍之要領李時升以提督大員衝鋒勦賊是其專責乃動輒派委員弁迎敵並不躬親行陣督率進剿若無與己事者然且按圖詳校由楞木退至鐵壁關復以次退至杉木籠而朱崙亦自戶腊撤退至隴川皆係漸回內地並未奮勇進兵惟以捏詞欺罔爲能事是二人實爲此案之罪魁業經降旨革職拏問乃楊應琚此次仍不將李時升朱崙嚴行參處僅以副將陳廷蛟等五員奏請革職如果伊等臨陣退縮卽當以軍法從事亦非止予罷斥可了若不過尋常過犯又豈可以劾此數人便足示軍營懲創種種錯謬均出情理之外此楊應琚前後辦理緬匪情節也總之辦理緬匪一事朕初無欲辦之心因楊應琚以爲機有可乘故聽其辦理及至緬匪侵擾內地則必當殲渠埽穴以申國威豈可遽爾中止且我國家正當全盛之時

準夷回部悉皆底定何有此區區緬甸而不加翦滅乎而楊應琚竟思就事完事實爲大謬至此時尚不知翻然改悔奮勇自效深負委任之恩若非念其痰病糊塗必將重治其罪但如此漫無措置軍務斷非伊所能辦理若仍令其復膺重任必致僨事失機其爲貽誤更大楊應琚著回京入閣辦事俾得安心調攝其功過於事定後再降諭旨雲貴總督員缺著明瑞補授前往經理軍務相度辦理並將此通諭中外知之○諭軍機大臣等楊應琚辦理緬匪一事種種錯謬不能復勝此任已降旨令其回京入閣辦事其雲貴總督員缺令明瑞補授前往永昌接辦軍務明瑞此行專爲進勦緬匪調度軍營一切機宜並令其奮勵將士鼓勇奏功是其專責至於地方應辦之刑名錢穀銅廠等事斷難兼顧鄂爾琿以巡撫駐紮省城一切皆當實心承辦並不必關白督臣卽稽察屬員

侵漁貪劣諸事亦不責之明瑞設有徇庇疏容惟於鄂甯是問鄂甯斷不可稍存畛域慮有越俎之嫌卽明瑞亦斷不致心存小見疑鄂甯有侵攬事權之意朕當於其陛辭時面爲諭及也可將此詳諭該撫知之○丙寅廣直隸本年科試學額○調託庸爲工部尙書以明瑞爲兵部尙書○丁卯命減直隸軍流以下罪○戊辰諭軍機大臣等據福靈安奏前赴永昌經楊應琚告知見在瘴氣方盛交秋始可進兵並告以朱崙雖赴木邦堵禦並未進剿等語楊應琚從前奏報節次辦理緬匪各摺乖謬已極經朕命福靈安親往軍營體察實情楊應琚旣知措置乖方自應將該處實在事宜詳悉相告乃復以秋後進兵之語含糊粉飾希冀苟爲塞責夫軍營進止有關於機宜者甚大楊應琚卽不能督率戎行爲搆穴殲渠之計亦當察看地方形勢將何時進剿之處先行詳悉奏聞

候朕酌定何以前此並不籌及進兵日期竟以勦賊重務置之度外經朕諭令酌量春夏瘴過興師進勦楊應琚卽藉以爲苟且了事稍延時日之局實不知其具何肺腸也又楊應琚前奏令朱崙統兵進勦今告福靈安則以朱崙切齒緬匪往彼堵禦俟賊至卽可多殺數人不但荒唐不堪亦自相矛盾朱崙前由楞木退回戶腊撤復由戶腊撤而至隴川漸次退回內地其怯懦無能可知今復自西而東豈得謂之統兵前進況朱崙往木邦一路在賊匪由猛卯渡底麻江之後朱崙尾追尙不能及又安能越過賊眾至木邦堵禦是朱崙之往木邦不過僅圖退守卽堵禦且不可言又豈得謂之前進乎竟不料楊應琚信口枝梧欺誑至於此極伊從前飾詞奏報朕猶意其風痰病後神志昏迷爲將弁所蒙混今病已就痊仍復爲此支離誑飾之語以文過遂非其居心更不可問楊

應琚從前受朕深恩歷任封疆至於入參綸閣及伊患病賜藥賜醫多方軫恤不意其天良盡泯至於如此所有指出錯謬之處著楊應琚逐一據實明白回奏可將此嚴切傳諭知之○己巳諭東西二淀爲畿輔匯萃清流之所邇年積蓄安恬宣洩有藉近淀村莊田土泛溢無虞而菰蒲魚蟹之饒利賴於民生者更大茲者春巡郊甸循覽河隄鳳艇乘流祥飈助順尤足徵 神貺之昭宜建專祠用答 靈佑著該督方觀承卜地興工特崇廟祀以示安神報功之典尋奏霸州泰堡莊南臨玉帶河西近于家村形勢爽塏建祠爲宜計應建正殿前殿東西配殿佛閣並東西廂房大門共三十四間 御碑亭一座左右鐘鼓二樓石獅二座俟秋後興工得旨嘉獎○諭軍機大臣等今日檢閱楊廷璋楊應琚商榷會奏一摺有若緇匪仍不誠心效順難保將來不滋生事端等語實

屬自相矛盾我兵自新街失挫之後朱崙李時升漸次退回內地以致賊眾猖獗偷越蓋達邊境復竄入猛卯侵擾土司地界我兵從無抵禦是賊眾見在毫無悔懼尙安得謂彼有歸順之意乎其爲荒唐不足信尤屬顯然至所稱差委安人前往查探尙未據探明回報等語今距該督前發奏摺時已將兩月所探情形若何亦當早已覆到何以延緩多時該督屢次奏報並無一語提及更不可解看來楊應琚前此尙因病後神昏輒據朱崙等說報欺彼之言轉奏欺朕今病已就痊經朕屢次降旨嚴飭伊計無所施遂爲此蒙混支離之語希圖塞責朕何如主而容彼逞此等伎倆乎著傳諭楊應琚因何含糊覆奏及差探之人所探實在情形若何卽據實覆奏無得仍前支飾自速罪愆○免直隸通省通賦○庚午上聞鹽池○閱天津駐防滿洲兵以弓馬及國語生疏命議都

統富當阿等罪示懲○辛未 上駐蹕天津○壬申閱綠營兵○
癸酉諭軍機大臣等據福靈安奏稱於龍陵地方遇見李時升告
知朱崙在暮董地方駐兵將及一月等語前楊應琚節次奏稱朱
崙已由木邦一路進剿匪眾並稱李時升親率官兵占據新街以
爲進兵之計朕彼時卽知其荒唐捏飾業經降旨飭問今福靈安
稱朱崙在暮董駐紮已將一月暮董又在木邦之內朱崙駐彼遲
留觀望退縮不前與木邦有何干涉而楊應琚猶詭稱其統兵前
進天下有如此不顧情理任意掉謊者乎至李時升旣見在龍陵
其地在騰越以東更屬內地土司境界距新街甚爲遼闊與楊應
琚前奏率兵進剿占據新街之語尤屬矛盾况李時升朱崙俱係
軍營統兵大員旣皆由西而東則銅壁關一帶地方又委之何人
經理其各該處要隘見在作何駐兵防守緬匪賊眾見聚何處並

未見其明晰具奏行軍何等重務而可如此漫不經意乎至從前
新街小挫之後兵既退回朕料及蠻驍新街必皆棄而不守因諭
楊應琚以該處既隸版圖自當奮進收復扼其險要爲進兵之地
伊卽當按其地風土情形據實籌辦如或交春瘴發不宜輕涉亦
應將實情奏聞候朕定奪乃以李時升進兵一語希圖搪塞其將
誰欺且此時徼外瘴癘漸盛朕豈肯令我士卒冒瘴遠涉不加體
恤乎楊應琚不懲李時升朱崙從前畏葸僨事之失至此復冒昧
妄行旣不因時又不恤下種種乖謬是誠何心若因錯誤在前曲
爲迴護冀以虛詞蒙蔽朕何如主而容彼施此伎倆乎楊應琚如
此迷而不悟恐其福氣已盡不至自取罪愆而不止著嚴切傳諭
楊應琚令其卽行據實明白回奏毋再仍前支離速咎○免伊犁
屯田回人舊欠麥穀○甲戌 上回鑒○乙亥諭朕此次巡行河

淀閘視隄防今由運河回鑿經臨筐兒港察看減河形勢見壩身出水處高於河底七尺則遇汛漲時所減之水下注過猛易致跌落成坑排椿不無撼動自應於石工之外接築灰工十五丈使坦坡漸平以導其勢至王家務捷地興濟三處減河皆所以宣洩盛漲保衛隄工別由一路入海不使三岔河之水匯積尤爲畿南水利攸關亦宜一律疏濬流淤期於深通易達再子牙河故道自谷家莊以下至吳家溝一帶河身窄狹並應普律展寬用消滙水以衛民田所有各處工程著該督方觀承按工覈實估計奏聞動帑興修務使疏洩得宜俾河務民生永資利賴副朕省方疇咨至意

○丙子移江蘇蘇松糧道駐蘇州兼巡蘇州府○丁丑 上幸南苑行圍○諭緬甸僻居荒徼前此未聞其跳梁侵軼本無庸加以兵誅並未嘗因國家富全盛之時邇年來平定準夷回部我武遠

揚更欲並炎方蠻服一併埽平爲拓土開疆計也今楊應琚覆奏
稱緬酋猛毒頻年滋擾土司邊境若不乘時撻伐誠恐養癰貽患
等語此皆從前吳達善劉藻等不以爲事因循貽誤所致使伊等
將此情形早行入告朕斷不肯過事姑容必特派能任事之大臣
前往督理亦決不以此委之楊應琚矣至楊應琚初到滇時以緬
匪自作不靖欲爲籌辦其意亦未嘗不善但旣欲用兵必須通盤
計算扼肯綮以決機宜朕尙謂楊應琚久莅外任閱歷已多雖軍
旅非其素嫻而審勢運籌自當確有成算孰意其當蠻募新街等
處相率歸誠時惟稱有可乘之機不致重勞兵力並未統策全局
布置周詳使新附之區永隸輿圖無貽後患遽爾輕率受降已爲
失算至於新街一帶旣爲緬甸扼要又不知嚴兵駐守據爲入緬
先聲致趙宏榜冒昧徑行一旅孤懸無援敗衄更屬毫無調度而

楊應琚自新街小挫旋即憂惶成疾其後病雖愈而神志終迷漫無主宰一任綠營將弁捏詞虛報展轉欺蒙恬不爲怪朕節次覽其奏牘覺情節多屬可疑始詳悉指駁令其據實陳奏今據奏到則從前所稱殺賊盈萬及緬酋乞降俱係朱崙趙宏榜虛張粉飾歷來錯誤之處一一不出朕之所料楊應琚諸事荒謬至此若再令其在滇經理其誤事更不知何所底止而緬匪本篡逆餘孽且敢侵擾邊疆惡貫已盈罪難輕宥更不可不亟加翦滅因命明瑞代其總督之任奮勵將士務期克捷奏勳此仰賴 上天默佑啓迪朕衷先幾已燭其情僞尙可及早圖功並非有人能指其謬誤將萬里以外情形陳於朕前也楊應琚覆奏原摺並發眾人見之當無不共曉者可將此通諭中外知之○庚辰 上還京師○辛巳諭楊應琚辦理緬匪一事種種欺飾錯謬不可枚舉已將此事

始末宜論中外矣卽此番覆奏各摺調度乖方更出情理之外如
總兵劉德成本與華封同在東路駐守朱崙在西路征勦乃楊應
琚於去冬輒將劉德成調至近西之盩達一帶而勦截底麻江賊
眾則又舍附近之烏勒登額不行專檄堵殺又不委東路之華封
等相機迎擊轉令朱崙自西而東從後尾追當此軍務緊要之時
而東西更調措置失宜實不解其何意想該督漫無定見亦未謂
度任無能之總兵等東西自由雖稱勦賊實乃避賊耳至另摺所
奏劉德成遷延不進乃去冬之事何以遲至今年二月杪始與烏
勒登額之觀望不前一併參劾明係楊應琚此時自知難以隱諱
姑爲此奏塞責夫賞罰嚴明乃行軍先務而漫忽因循若此尙何
以示勸懲勵將士乎但二人俱係總兵大員而習爲畏葸怯懦旣
據參奏亦斷不可姑容貽誤劉德成烏勒登額俱著革職鞫解

交刑部治罪總之楊應琚辦理此事狃於前此剿除莽匪之易以爲緬夷亦不過偶爾滋擾無難驅散使思微幸居功及賊眾侵據新街等處又毫無主宰不能決機制勝鼓勵前進振我軍聲惟任綠營將弁粉飾欺蒙於賊少處駐兵躲避而楊應琚不知事理輕重尙據軍營謊報謂緬酋遣人乞降求賞新附之地冀朕允行便得將就了事若非朕燭其情僞嚴切飭詢其底裏安能畢露設如楊應琚前奏遽爾罷兵則竟視內地土司任賊匪侵陵而不顧尙復成何事體而緬賊稔惡至此若不亟加翦滅又何以申國威而靖邊徼乎朕前此尙原楊應琚病迷所致是以加恩降旨令其入閣辦事其功過俟事竣再定今舛誤日甚一日斷難期其後效雖稱親赴沿邊一帶督辦見在已非進兵之時諒亦不過虛應故事楊應琚負朕委任恩眷豈可以虛僞詐妄之人謬廁綸扉著革去

大學士仍交部嚴加議處○命陳宏謀爲東閣大學士兼理工部
事劉綸爲吏部尙書協辦大學士○壬午諭楊應琚辦理緬匪種
種謬妄已屢降諭旨宣示中外矣茲據覆奏從前詢問各情節其
乖舛荒唐之處皆不出朕所料如所稱沿邊地方袤延一千餘里
附近各關山僻小路並未設法堵剿其餘巨石萬仞等關亦止各
派兵二百名以致匪眾越至盡達並漫入戶腊撒隴川等語我兵
自新街小挫之後使能得其要領鼓勇直前收剿新街等處擒斬
一二賊渠則烏合之眾自必聞風奔潰何轉致紛竄內地皆由李
時升朱崙畏葸餒怯惟擇賊少處所退避倖安不能掩擊追捕轉
使賊眾乘虛闖入益無忌憚敢於肆行滋擾二人皆統兵大員如
此懼敵失機此而不予以重懲何以示儆而楊應琚從前竟視爲
泛常姑容貽誤不知具何肺腸且自十二月以後總未出關剿賊

及烏勒登額駐紮宛頂並不就近掩擊底麻渡江賊眾皆經朕洞燭及之按圖嚴詰楊應琚知難以再爲隱飾始一一傾吐則伊前此所調度者何事屢次所謊報者何心不意其盡昧天良一至於此著再將此諭部知之諭軍機大臣等據楊應琚覆奏詰問各情節其種種舛謬果不出朕所料實爲盡昧天良業經明降諭旨矣如總兵烏勒登額駐紮宛頂於賊匪過底麻江逃竄時並不調兵掩擊其坐失事機之處從前奏報並無一語提及經朕降旨嚴詢昨始據將該總兵參劾乃楊應琚今日奏到則稱前已奏參在案計其發摺之期相距僅隔一日而竟若其事已早經辦理者明係因朕切責及此自知參奏遲延難以支飾故倒提月日先爲前奏然亦不過隔一日耳何能希圖沾腳復作止含糊之語朦朧文過其居心更不可問著將此嚴切傳諭楊應琚令將前後兩奏是何

意見據實覆奏○癸未諭軍機大臣等據湯聘等奏緬匪竄入孟
艮地方將整賣景線乘虛侵占已同楊重英夔舒前往普洱就近
督率料理一摺已另有旨諭矣此事先據楊應琚奏稱探聞緬匪
有欲滋擾整賣之信普洱相距甚遠已飭該土司並附近土司協
力防禦見在作何辦理及堵剿情形若何此次緬匪竄入孟艮等
處楊應琚曾否據報籌辦著傳諭楊應琚卽速覆奏湯聘摺並著
鈔寄閱看又諭楊應琚辦理緬匪一案調度乖方種種舛謬錢度
在永昌軍營辦事一切情形自所深知楊應琚屢次奏摺謬妄支
離不可枚舉而近日覽其覆奏各摺似覺稍有條理或由錢度代
爲酌商亦未可定著傳諭錢度將楊應琚前後辦理各情節及李
時升朱崙欺罔軍情各實蹟速卽據實詳晰覆奏藩臬兩司遇有
地方緊要事務督撫辦理不善原許其具摺奏聞錢度從前不行

入告或以事關軍務不敢從旁干預朕亦不深責此次經朕詢問若不據實陳奏則是自取罪戾矣况楊應琚乖張欺飾之處皆經朕豫爲燭照因而底裏畢露並非有人指摘此時楊應琚罪狀已定錢度卽和盤托出於楊應琚功罪亦毫無增減錢度更不必稍存掩護代爲受過也著將此傳諭知之尋奏楊應琚辦理緬匪一案先因騰越副將趙宏榜稟稱蠻彝土司投誠我兵已據新街遂以爲機有可乘調兵三千六百名卽令趙宏榜先往受降迨行至潯源地方接據趙宏榜告急文書知新街已失始加調各鎮營兵並提督李時升總兵朱崙於十月初同至永昌督辦十一月初八日官兵初抵楞木與緬匪接仗彼此互有殺傷詎緬匪分眾由萬仞關小路竄入永順將蓋達焚燒延及戶腊撒並將銅壁關官兵衝散楊應琚卽飭總兵劉德成於蓋達等處勦殺李時升亦遣遊

擊馬成龍由戶腊撤堵禦旋被緬匪衝散馬成龍陣亡賊眾將截
鐵壁關李時升朱崙竟將楞木兵一齊撤出以致新街之賊乘空
竄入會同戶腊撤賊匪焚燒隴川十二月底官兵陸續到齊又誤
聽該匪投誠之詐未經環擊致匪眾伺懈於正月初旬竄入猛卯
由底麻渡江宛頂官兵未能截殺緬匪遂將木邦占據楊應琚隨
飭李時升等奪取新街朱崙等追勦木邦賊眾官兵復遷延未進
僅將新街收復查滇省綠旗兵除昭通東川開化曲潯四鎮尙敢
與賊對仗餘皆退縮不前李時升朱崙均未親行臨陣混報斬獲
並不以首級耳記爲憑楊應琚取下姑息染患痰證旣未能察究
虛實迨病勢稍定又不立將畏葸官弁參處惟以該匪投誠具奏
實屬欺罔得旨覽奏俱悉○刑部等衙門議奏欽差侍郎期成額
等審訊原任湖南巡撫李因培於署常德府錫爾達揭報武陵縣

知縣馮其柘虧缺錢糧二萬餘兩因甫經保題倉庫無虧礙難入
奏與布政使赫昇額商令桂陽州知州張宏燧前往查覈代爲彌
補止將有抵之項八千餘兩轉揭題參並欲將原揭之錫爾達尋
事參劾實屬營私欺罔赫昇額扶同徇隱並擅發藩庫銀五千兩
給張宏燧代爲補苴任意舞弊請照軍務錢糧合奏公事規避增
減緊要情節朦朧奏准因事發露斬候例擬斬請旨卽行正法至
馮其柘侵虧錢糧至二萬餘兩張宏燧迎合上司擅將官項那移
代人彌補並致本任庫項虧缺一萬餘兩俱合依侵盜錢糧一千
兩以上斬候例擬斬候查該犯等恣意侵蝕數至逾萬應請立斬
均應如所擬得旨李因培著從寬改爲應斬監候秋後處決馮其
柘侵虧公帑至二萬餘兩之多張宏燧專事結納交通輒敢將帑
項任意取攜私行彌補虧空實屬湖南通省劣員罪魁均屬法無

可這張宏燧馮其柘俱著照部議卽行處斬至赫昇額於馮其柘一案令張宏燧覆查減改虧項代爲彌縫事由李因培專主赫昇額扶同巡撫辦理情節自較李因培爲輕不應以此爲赫昇額罪案其擅將鉛價五千兩發給劣員並素與張宏燧交結保舉及侯七郎一案怨懣常鈞徇庇張宏燧顛倒案情其罪實在於此著軍機大臣會同刑部再行嚴訊明確另擬具奏再降諭旨○甲申發健銳營兵五百名赴雲南○以德風爲內閣學士由詹事選○乙酉諭太學 文廟前經改用黃瓦楹枋鼎新迄今閱年已久宜重加丹牘式煥宮牆著交見在派修宮殿工程處課日鳩工敬謹繕葺用副朕重道右文至意○丙戌諭前廣東糧道有折收米石之案因思此事自查辦明福以後積弊旣清復自何人發端不可不徹底根究重懲示儆諭令李侍堯明山據實查奏旋據李侍堯等奏稱

折色之弊復始自富明安是以降旨革職拏問令該督撫等嚴審定擬嗣經楊廷璋王檢訊奏則於富明安是否首犯並不能確有證據轉以所供例得折色之數浮多七百餘兩遂指爲批外勒索併贓科罪當時閱其情節支離似乎有意周內不足以服其心因命將富明安解京令軍機大臣會同刑部質訊今據查覈卷冊詳悉研究則楊廷璋等所審富明安批外勒索一款毫無影響卽原奏未經入廢之米一百一十七石業經富明安移交後任糧道張曾接收見有交代印冊可據是富明安並非此案罪首而作俑之故又當於張曾是問至李侍堯等初次查奏時據收米草簿見富明安任內有未註入廢之項且經倉書人等供認因指富明安爲首先復犯但不根查交代冊籍亦難辭疏略之咎李侍堯明山均著交部察議至楊廷璋王檢等於富明安到案時犯證具在無難

質訊明確以成信讞如其事屬子虛卽應據實奏聞另行審辦何必遷就原參曲爲入罪使非朕令解京覆訊幾致重輕顛倒豈所以協情法之平楊廷璋王檢及承審各員並著交部嚴加議處朕辦理庶務一秉至公從不稍存成見使富明安果爲此案罪魁自難輕宥今既訊與富明安無涉自應究及接收之張曾儼張曾到案後又能供辨有據確指始自何人則張曾又爲無罪之人亦不難遞行根訊接收之人朕於富明安張曾並無所愛憎於其閒惟欲使其事水落石出實在首犯毫無遁情以正刑章而飭吏治斷不肯聽其含糊了事也恐外省督撫審理案件似此依違迎合者正復不少可將此通諭各督撫知之○丁亥 上親耕藉田○己丑諭前湯聘等參奏趙宏榜在新街輕進失事請將伊革職看守彼時以趙宏榜如果係輕進尙屬勇往向前猶可稍從末減因止

將伊革職令在軍營效力贖罪今覈此案情節則趙宏榜於新街
挫衄之後卽逃回鐵壁關以致新附地方棄而不守且前此又係
伊怙恩楊應琚啓釁此後又從未聞其鼓勵戎行率兵前進而楊
應琚方且保奏欲以都司復用是其諂媚總督畏蕙貽誤軍情之
罪不可不重懲以昭軍律趙宏榜著卽拏交刑部治罪○庚寅諭
李侍堯服制將滿著回兩廣總督之任楊廷璋著來京補授刑部
尙書○諭楊重英著以按察使銜留於雲南聽總督明瑞派辦軍
營事務所遺江蘇按察使員缺著吳埴補授○癸巳諭楊應琚辦
理緬匪一事種種捏飾乖張俱非情理所有節經明降諭旨宣示
矣今復據奏因聞緬匪竄入孟艮擬親往普洱就近督率堵剿等
語所奏尤屬荒謬可笑楊應琚前此具奏親往沿邊一帶督率將
士亟圖克復新街以爲進兵之地今忽將新街一路委之一副將

哈國興藉稱堵禦孟良前往普洱試思書洱距永昌尙遠計伊到彼賊匪又不知竄往何地且目下已非進兵之時伊卽親往又何益於事明係因新街有賊憚於前進故欲退回普洱希圖潛避顛倒錯謬若此實不解其具何肺腸此皆楊應琚罪案昭著之處難以自行掩飾者所有楊應琚奏到之摺並著鈔發俾中外知之諭軍機大臣等鄂甯密奏楊應琚毫無調度粉飾遷延一摺已於摺內批示又楊應琚奏見在親往普洱就近督率堵禦等語明係欲避新街之役故藉詞往普洱堵禦亦降旨宣示中外矣楊應琚辦理緬匪一案債事失機乖張錯謬種種不可枚舉此事已斷非伊所能籌畫且伊大學士及總督業已革退卽令伊仍在雲南暫管事務將弁等亦必不能聽其約束徒因彼在前得以售其欺誑更於事體無益楊應琚著革職鞫問傳諭鄂甯卽遴委妥員押解赴

京交刑部治罪明瑞未到之先所有總督印務卽著鄂甯暫行署理緬匪敢於侵擾內地抗拒官兵不可不興師問罪大示懲創但此時已非進兵之期楊應琚零星調兵抵禦並未能有克捷之處徒傷官兵元氣益令將士心生畏怯卽鄂甯所奏夔舒稟請加調貴州官兵之說亦屬無益且恐眾人聞知轉生驚疑鄂甯此時惟當示以鎮靜不可稍涉張皇恐邊外瘴癘已盛亦不必復令將士冒觸輕進莫若暫爲按兵不動使得養蓄銳氣俟明瑞到彼相度時勢剋期深入以奏膚功至楊應琚請將召丙革職尋問並欲將臨陣退縮土練等正法一節尤屬不知事體楊應琚以督臣膺勦賊重任尙不能督勵士卒鼓勇長驅致緣營將弁畏葸愆事楊應琚前此惟任欺蒙曲爲徇庇此時乃欲於新附土司求全責備何顛倒若是乎况召丙並未爲緬匪脅從僅因力弱無能攜家潛逃

尙屬情理所有而土練等尤不宜令其獨當一面如果善於驅策自當與官兵同效疆場又豈可脅以刑威過於刻責乎若此時將伊等一體治罪既不足以服其心轉使徼外土司心生疑畏又安能望其歸誠用命乎召丙及土練等俱不應如楊應琚所奏辦理若彼已將召丙拘執卽命鄂甯釋放並宣示朕旨俾其感戴德意永受綏懷其見在一切軍營應辦之事並著鄂甯悉心籌畫務期妥協至進剿機宜俟明瑞到滇辦理可將此傳諭知之

夏四月乙未諭昨鄂甯奏抵滇查詢原由一摺內有接據署普洱府黑光等稟稱欽差監軍楊之語其名甚屬不經已於摺內批示恐該省無識之人尙有襲爲謬稱者不可不明白宣諭前令楊重英馳往雲南軍營辦事其時楊應琚乖張荒謬各罪狀尙未昭著朕念其或因病後心神失據致爲緣營將弁所蒙貽誤重務伊子

楊重英平日尙屬曉事是以令其星馳前往襄助伊父辦理一切至原諭內所云做監軍之意亦猶楊廷璋前在粵西義甯以道員而該省督撫委以辦監軍之事今楊重英在滇亦不過令其同總兵等與聞軍營諸務並非加以監軍之名也乃該省竟稱爲監軍且冠以欽差字樣實爲不諳事體楊應琚以總督膺勦賊重寄斷無命他省臬司往監督臣之理况楊重英又係其子豈有以子而監父者乎設朕前此欲遣人往監其軍必特派大臣前往經略彼一按察使烏足以當之看來此稱未必非出於楊應琚之意或以伊子奉命赴滇輒自引爲榮寵遂爾張大其詞不顧稱名之妄而所屬各員轉相傳述加以豔稱幾如明季令內監監軍之事成何體制不可不亟爲改正見在已命明瑞前往總督雲南辦理軍務楊重英交與明瑞以道府銜聽候差委至楊重穀前此諭令至永

昌侍伊父疾今已回省城將赴湖南原任楊應琚見在自取重戾雖罪人不孥其子原無庸一體坐罪但楊應琚如此負恩誤國其子豈可仍舊服官宴然安享爵祿乎楊重穀著革職同楊應琚進京有問訊之處並將此通諭知之又諭楊應琚奏副將哈國興等兵抵新街緬匪一面應敵一面上船逃遁見在我兵據守新街嚴行搜捕防禦等語可見緬匪原屬不成事體卽從前楊應琚節次所奏賊眾數萬聚集新街之語亦全不足信皆由將弁畏葸退怯不肯出邊勦賊遂致賊眾得蟻聚新街今我兵一到緬匪卽不敢抵敵惟事奔逃則烏合之眾猥劣無能更可槩見使楊應琚早能策勵士眾奮往直前不獨新街久經克復卽乘勝長驅徑搗賊巢亦易爲之事何至遷延玩誤動以虛詞誑報自取重戾乎將此宣諭中外知之○軍機大臣等議奏前因天津駐防水師營兵武藝

平常甚至不能清語乘騎奉旨將該都統等治罪仍著臣等查明天津水師營設自何年兵額若干及應如何分遣另駐之處詳議具奏查天津向無滿兵雍正三年因天津界海爲福建浙江江南盛京等處商船出入要隘駐兵二千名乾隆九年增一千名二十五年奏裁五百名見駐二千五百名養育兵三百四十二名此項兵爲防海口而設今海面久已甯謐自可移撥他省查福州駐防末隊兵二百二十九名見經該將軍奏請調取廣州駐防二隊兵四百九十八名向來缺出亦係由京調取似可將此項兵分別派往福州見在請調到時即可補額廣州見未有積缺請調到時令暫食原餉俟缺出續補再查涼州兵前經移駐伊犁所遺駐額亦可派一千名往補原缺餘兵七百餘名請分駐山海關保定府永平玉田三河昌平等州縣所剩養育兵三百餘名亦應一體分派

帶往所有水師營額請悉裁從之○辛丑諭戴第元奏請增至聖誕辰祭祀一摺殊非正理誕辰之說出於二氏爲經傳所不載國家尊師重道備極優崇釋奠二丁自有常制援據禮經實不同於尋常廟祀且昔人於孔子生日辨論紛如尤難臆定况孔子儒者之宗也尊孔子者當卽以儒者所聞孔子之道尊之戴第元乃欲於彝典之外輕增一祭轉爲褻越而不足以昭隆禮士不通經所奏宜擯○甲辰諭軍機大臣等今日閱楊應琚明白回奏一摺更不成話如所稱與楊廷璋會奏當厚集兵力俟至秋間分路進剿以期永靖邊陲等語實屬支離掩飾上年十一月以後節次披閱楊應琚等奏報知緬匪負固跳梁斷不可苟且了事是以傳諭伊等令其豫爲調度俟春夏瘴過興師乃朕籌度邊情先期指示並非楊應琚等從前已有此議且其與楊廷璋會奏摺內所稱遵旨

豫集兵馬俟瘴過進兵亦係中無定見故作此語以爲嘗試之計
或幸朕從其納降苟且完事之意非能實心痛恨緬賊決機進剿
之奏也今楊應琚乃以奉旨飭辦之事遂據爲先行籌及之事有
是理乎至楊應琚初辦緬匪時朕尙不知緬酋前此滋擾情形因
思緬酋如果將召散獻出卽可無事多求且其國僻在荒徼亦不
值一辦是以諭令楊應琚等酌量事機妥協經理今緬匪敢於抗
拒大兵傷我士卒並且竄入內地侵擾已成騎虎之勢斷難中止
此而不大張撻伐何以振國威而申天討耶楊應琚前此所爲相
機籌畫者何事後此遽欲草率了局者何心不可不詳加詰訊前
已降旨將伊革職拏解來京著傳諭明瑞於中途相遇時卽將此
等情節逐一究詢錄供覆奏况緬匪一事係楊應琚始終承辦其
一切情形及詳晰始末明瑞亦當向彼細問以備稽覈如所言尙

存虛飾或果爲將弁欺蒙種種情節明瑞到軍營後覆加考察其
底裏自然畢露既可知其確切罪狀卽軍務邊情亦未嘗不可因
以究辦酌籌得其竅要至李時升朱崙等並經擊解在途明瑞不
拘何處遇見亦著將應行研鞠之處詳加訊問一併奏聞卽稍稽
半日之程亦無不可將此傳諭明瑞知之○丙午嚴禁各省將軍
大臣調任擅帶弁兵○己酉 上詣 黑龍潭祈雨○庚戌諭昨
楊應琚覆奏辦理緬匪一摺支離謬妄之處更不能掩今日又據
鄂甯奏其欺飾乖謬情形皆彼實在罪案無可置辨者如朱崙等
以統兵大員並不奮勇勦賊漸次退回其畏葸不前之罪皆經朕
於萬里外洞燭其情僞屢行嚴切飭諭楊應琚前此並未早爲參
劾且據朱崙遣散匪眾一語妄行飾奏其摺具在無從狡飾也今
見朕將朱崙等治罪轉稱前據稟時卽疑其言未必確實果如是

則前摺何以不言及爲大臣而如此居心巧詐尙得謂之稍有天良乎至所稱差遣民人李自新往東路查探等語所奏尤爲錯謬探訪賊情乃軍營要務自當慎重辦理楊應琚所屬豈無幹練員弁足供任使顧令一介小民前往偵探安能得賊中真實消息卽使其言之鑿鑿又果足盡信乎如此措置失宜更不可解其具何肺腸矣至鄂甯摺內所稱湯聘懷詐塞責之處湯聘誠不能無罪前已降旨將伊交部嚴加議處但湯聘本屬書生未諳軍旅用兵之事朕原不於彼責成况楊應琚身膺重寄尙且庸謬若此於湯聘更無足怪但楊應琚種種欺罔乖張湯聘若早如鄂甯之據實陳奏朕必嘉其公正乃竟隱忍不言是誠何心其咎固在此而不在于彼耳著再將此宣諭中外知之○諭軍機大臣等前因閱視河淀情形見鳳河有斷流之處於回鑾駐蹕南苑時令查勘上源疏

濬以達河流今據阿里衮等查奏團河下游卽爲鳳河一畝泉下游卽歸張家灣運河俱應行開挖深通已有旨給發帑金及時修濬矣但此二河下游皆係地方官應行經理之事聞其中亦不無淤淺阻塞今上游旣議修治而下游若仍聽其淤梗是尾閘不能暢達疏濬水源亦屬無益著傳諭方觀承卽派委明習妥員前往查勘將應行開挖之處及時興工務使一律暢流以資宣洩仍將勘估情形據實覆奏尋奏鳳河自南苑東南閘口起經大興通州東安武清各境其自南宮村至大清河口入北淀下游一律深通南宮村以上瀝水下注泥沙衝入每易淤墊一畝泉自南苑東紅門閘口起至張家灣入北運河水盛時未能暢注臣遵旨率同明習工程之員逐段查勘鳳河自閘至南宮村長二萬一千一百二十七丈內大興境一百八十丈通州境九十五丈武清境七千四百七

十三丈無庸挑挖實應挑河身一萬三千三百五十四丈一畝泉
自開口起至張家灣運河長六千九百二十七丈河身本窄兼有
須裁灣取直之處兩河均應展寬河面五六丈底寬三四丈深五
六尺不等共估帑二萬一千四百餘兩見已派員分段興修得旨
嘉獎○諭昨楊應琚奏秋冬進剿緬匪事宜一摺種種未協已交
軍機大臣議駁矣如摺內首稱調撥官兵五萬之處全然不知事
體從前勘定準夷回部迅奏膚功所需兵力亦未嘗動至數萬楊
應琚歷任陝甘豈無聞見而爲此悠謬之說明係其心仍不欲進
兵故爲張大其詞以見事非易集苟不如數撥給又可藉口於兵
力不足非伊退阻不前之咎如此取巧伎倆敢於朕前嘗試其天
良不幾喪盡耶至欲約會暹羅夾攻一節更屬荒唐可笑用兵而
藉力外藩不但於事無濟且徒爲屬國所輕乃斷不可行之事明

季資其援助實爲恒怯無能豈可引以爲據况我朝兵威遠播所向懾服安藉此海外窮荒爲王師犄角若將來緬酋窮蹙竄入暹羅或匿其近境則馳檄索取飭其擒獻如巴達克山之於霍集占獻馘蔽功未嘗不可相機籌辦此時固不必豫爲計及也摺內惟兵糧一條令各土司乘春廣爲播種以備進兵時購用之需其事尙屬可行明瑞到彼與鄂爾悉心籌畫妥辦所有楊應琚原奏及軍機大臣議覆各摺俱著鈔寄閱看可將此傳諭知之○壬子諭楊應琚明白回奏一摺其李時升朱崙畏蒞遷延各情節無不一如朕所豫降諭旨此二人之罪固無可逭但前此楊應琚何以並不據實參奏及至朕洞燭其欺詐情形屢降旨詰問始據將朱崙等參革治罪豈欲以事後一効遂思掩其前愆耶又據稱從前種種辦理乖謬實係病中貽誤初時朕亦何曾不鑒諒及此迨伊病

既就痊而掩飾支離仍復如故則又何說之辭至緬匪前自新街至猛卯渡江復往木邦滋擾毫無顧忌朱崙領兵不過尾追其後其沿途耽延並不肯急爲掩擊賊眾何至奔逃而摺內尙稱緬匪遁往木邦此皆綠營將弁惡習信口誑談恬然不以爲恥實屬鄙惡不堪至於蠻蕃新街前此已爲賊踞今賊眾散去我兵仍駐其地並非用力攻勦所得而覲顏謂之克復猶得謂有羞惡之心乎所有楊應琚奏摺並著鈔發俾眾知之○甲寅命各省大計藩臬兩司由督撫出考○庚申諭張泰開著以禮部尙書專管左都御史事所有禮部尙書事務著嵇璜署理○辛酉以恩錫漕糧命業戶佃租減交蠲數之半

五月甲子朔設下五旗包衣人等官學生缺○丙寅諭蔣漕係大學士蔣溥之子因加恩擢用至兵部侍郎伊受任以來尙知感恩

勤慎今聞溘逝深爲惻惻所有應得卹典該部察例具奏伊子原任知州蔣日烜俟服闋之日該部帶領引見尋予祭葬○調周煌

爲兵部侍郎以蔡新爲刑部侍郎

服闋刑部侍郎

○已已諭楊應琚辦理

緬匪一事種種乖謬湯聘從前並未奏聞朕以軍營之事湯聘或未能深悉尙可不加深責僅從寬交部議處仍將伊調任貴州巡撫今據明瑞奏到李時升呈出書札彙本則李時升於此事前後情形無一不告知湯聘李時升係提督大員一應軍務皆當隨時入告固不能因此稍寬其罪但湯聘既據李時升手札則於楊應琚僨事乖方之處詳悉備知竟爾扶同諱飾匿不上聞封疆大臣敢於瞻徇蒙蔽若此其心實不可問湯聘著革職交刑部治罪所有貴州巡撫員缺著鄂寶調補卽由該處馳驛前赴新任其湖北巡撫印務著定長暫行兼署○諭軍機大臣等本日明瑞奏到

事件已於摺內批諭矣同日據楊甯奏稱木邦約有賊匪萬餘我兵未及四千彼此相持等語見在木邦統兵打仗之事自屬楊甯專責至一切調度機宜非其所長計明瑞此時已抵滇省卽當悉心籌辦前曾降旨鄂甯令其於驅賊出界後將沿邊一帶嚴密堵禦其進剿官兵暫行撤回俟秋深厚集兵力再行深入但賊匪見在江內結寨恐我兵一撤彼卽尾隨入內侵占地方亦不可不加審慎目下瘴氣方盛已非進兵之期但今已屆五月距深秋進兵之期不及半年撤回後仍須調遣往來僕僕亦不免徒滋勞頓况瘴癘非隨地皆有賊眾旣在木邦屯聚或該處瘴氣稍輕如此際機有可乘自不妨添選官兵先將木邦收復剿殺賊匪震以先聲且爲將來進兵之地或佯爲撤兵誘彼出寨得以出其不意邀截掩殺亦設奇制勝之一法或在彼駐兵無益卽撤回以蓄我兵銳

氣秋間更調新兵亦無不可俱著明瑞確按該處實在情形熟籌妥辦再覈閱李時升所存書稟彙本內有漢奸勾串賊匪從萬仞關竄入蓋達之語是此次緬匪滋事皆漢奸暗中勾結此必當先行查辦使謀無所施賊無所恃最爲緊要乃楊應琚李時升前此並未辦及亦未奏及一語其失機僨事病根蓋由於此明瑞到彼可卽速留心偵訪嚴密查拏盡法處治務使淨絕根株以杜奸宄可將此傳諭明瑞悉心經理將籌辦各情由卽速奏聞○庚午諭軍機大臣等昨據明瑞奏到李時升呈出往來書稟彙二本內有永昌府檄緬甸文彙閱之深可駭異緬匪連年侵擾邊界自應加以問罪之師非可僅煩文告設欲責諭大義使之震懾先聲尤當奏聞請旨豈可匿不上聞率行馳檄且傳諭外夷立言亦自有體乃其中有數應歸漢一語實屬舛謬夫對遠人頌述朝廷或稱天

朝或稱中國乃一定之理况我國家中外一統卽蠻荒亦無不知
大清聲教何忽撰此歸漢不經之語妄行宣示悖誕已極卽如前
此平定準夷回部時如哈薩克巴達克山未嘗不加傳諭曾有如
此荒唐者乎且召散逃往緬甸向彼索取檄內何無一字提及俱
不可解而所稱調集精兵五十萬大礮千尊等語旣張大其詞不
成事體至稱楊大學士威德之語尤爲恬不知恥永昌府知府何
人率意妄行乃爾必係楊應琚授意所致但檄文出自誰手及差
何人持往緬甸緬甸又如何回覆並楊應琚如何不先行入告之
處俱著明珠逐一確查覆奏將此傳諭知之○發健銳營兵五百
名赴雲南○以范時綬爲湖北巡撫命常鈞駐哈喇沙爾辦事○
調張泰開爲左都御史嵇璜爲禮部尚書○辛未禮器館總裁于
敏中等奏恭查 御用雨衣雨帽用明黃色一品大員以上 御

前行走侍衛各省督撫用大紅色文三品武二品止用大紅雨帽
至三品以下官員及跟役人等亦應區別以辨等威今擬文武三
品皆准用大紅雨帽四品五品六品俱用紅頂黑邊七品八品九
品及有頂帶人員用黑頂紅邊交禮器館增入官服圖並入會典
知照禮部通行在京各衙門及直省文武一體遵照在內廷行走
之員向不論品級俱戴大紅雨帽仍應照例得旨所奏是應照此
辦理○丙子以觀音保扎拉豐阿額勒登額等爲領隊大臣領健
銳等營兵二千名赴雲南○丁丑諭軍機大臣等據楊甯等奏稱
四月十七日夜賊寨施放槍礮不絕我兵相持至曉賊勢甚眾臣
等調集各路官兵盡力決戰詎右翼各營弁兵散亂賊遂乘勢侵
擾所餘兵丁俱由山梁退避賊分兩翼將營盤圍住臣等聚集散
兵退至龍陵拒守請將臣等嚴加治罪等語緬酋等敢於滋擾邊

境抗拒王師皆由前此楊應琚等毫無調度所致楊甯等甫至軍營未及二旬且見在大軍未集賊兵乘隙跳梁楊甯等原未可深罪至單內所列逃兵二百四十餘名伊等臨陣畏葸望風遠颺情罪深爲可惡我朝軍紀嚴明人知奮勇自效從未有見敵潛逃毫無顧忌至於若此之甚者此等皆軍律國法所不容著交與明瑞鄂甯逐一查明嚴行緝拏卽正顯戮以昭炯戒其右營官兵因何遽行散亂領兵員弁俱係何人俱應一併查辦嚴懲但此時明瑞等方經到滇應辦重務甚多且不必蒼黃急辦總於進兵以前詳悉查明分別情節明正其罪以示軍紀看來滇省綠營兵丁積習選懦不堪實難望其奮勉出力見在續撥滿兵二千分次前往合前次共有三千此外綠旗之兵尙需若干卽於四川貴州兩省內就近酌量調用不必更用滇省之兵以收實濟須於進兵九月以

前到永昌方不誤事明瑞可一面辦理一面奏聞再楊甯奏稱至
遮放地方所有運糧文員及帶兵防守之守備陳謨等俱已散去
此等文武員弁非兵丁等可比情罪尤爲重大著交與明瑞等一
體嚴行查辦所有楊甯摺單並鈔寄閱看速行覆奏○免雲南大
兵經過州縣及永昌等三府州本年額賦並通省額賦十分之五
○庚辰免雲南各土司本年錢糧○丙戌諭滇省辦理緬匪一事
楊應琚挾詐乖張提鎮等復退卻貽誤屢經明降諭旨其尤足寒
心者彼此一味欺蒙而於軍中弁兵功罪一切置之膜外若不明
白宣示何以作士氣而振戎行昨覽李時升呈出札藁內有遊擊
班第守備江紀不知下落而楊應琚並不查明具奏遽謂班第等
未便作爲陣亡止可作爲受傷身故等語咨商李時升及廷訊李
時升亦有用兵以來不乏陣亡將士之供此等將士皆心知大義

捐軀報國使其一登奏牘朕必優加軫卹楊應琚竟甘昧天良使忠盡之氣鬱而莫訴於天理國法尙可容乎朕撫馭臣民賞功罰罪不使稍有失當而於軍律尤爲慎重向者西師之役刑賞勸懲不遺纖悉天下莫不共見共聞此等隨營士卒日久未回者其中脫有臨陣潛逃之事固當嚴行究緝俾正刑章若其效力疆場致命遂志而統軍大員竟爾視同草菅不得一與錄功之典將復何以用人何以集事著明瑞鄂甯將歷次打仗之陣亡官弁兵丁詳悉查明奏請卹賞以昭激勸其有雖非陣亡而迷失不歸及染瘴身故者亦屬以死勤事之人著一併查奏候朕酌量加恩用昭軍紀將此通諭中外知之○壬辰命王魯斯爲領隊大臣赴雲南六月己酉命李侍堯檄諭暹羅國嚴防緬匪竄匿○壬子召永泰來京以卓爾岱爲江甯布政使○甲寅山東巡撫崔應階奏查九

河故道徒駭一支由霑化縣入海向來運河異漲每資宣洩今地形轉高河身窄曲一時難議興挑勘有舊河漫口河形徑二十五里南高北低地勢順利於此開挑挖支河俾兩道分洩歸海較速茲於四月興工計河長四千三百餘丈岸寬二十丈及四五十丈不等今河身挖寬五丈五尺至十一丈不等深五六尺不等兩岸俱築新隄於五月內一律工竣報聞○辛酉諭朕恭閱 實錄內所載海澄公黃芳度閩門殉節忠藎可嘉業經准襲公爵十二次以酬義烈因思綠旗世職向無承襲罔替之條但如黃芳度之捐軀授命大義炳然自應破格施恩賞延於世以昭褒忠盛典至如征勦吳逆時將軍張勇趙良棟王進寶平定噶爾丹時提督孫思克諸人並各懋建勳庸昭垂史冊其承襲世職亦當一體加恩予以罔替又如提督陳福於王輔臣之亂勤勞間寄被賊暗戕及近

日勦平回部時提督豆斌總兵高天喜等雖不如張勇等之勦勞
茂著然均能奮勇疆場抒丹效命皆宜厚予恩卹用慰忠魂其襲
次滿時俱著照八旗例賞給恩騎尉俾其子孫得資以上進永遠
承恩世食忠貞之報此外有似此等應行分別加以優卹者著軍
機大臣會同該部詳悉查明具奏候朕再降諭旨國家承平百餘
年中外一統滿洲漢人皆我臣僕朕亦從不肯稍分畛域綠旗將
弁中果有爲國盡誠克奏膚功者自應錄敘從優恩施後裔若其
身歷戎行而選輒恇怯僨事失機如近日李時升朱崙等之負恩
誤國亦必明正典刑俾師武臣力知所做戒總之示懲示勸亦惟
其人功罪所自取而無所容心曲徇於其聞所以昭信賞必罰之
大經皆於是乎在將此通諭中外知之○諭侍郎額爾景額著馳
驛前往雲南在參贊大臣上行走著給與欽差大臣關防○諭軍

機大臣等明瑞等奏籌辦進兵各事宜俱甚妥協已於摺內批示
矣惟木邦乃進兵要路距永昌尙千餘里爲內地至阿瓦城適中
重地必須大員統兵三四千駐紮如從前西路用兵時巴里坤駐
紮辦事大臣之例則一應軍務自更易於策應見已降旨著侍郎
額爾景額前往在參贊大臣上行走俟明瑞秋冬進剿時鄂爾仍
於永昌駐紮額爾景額在木邦駐紮俾明瑞得以專力進攻直搗
賊巢而軍營一帶聲勢聯絡於調度機宜更爲有益所有應駐木
邦兵丁著明瑞酌量調撥至所奏查辦管糧官弁一摺胡邦祐已
著革職留於軍前效力贖罪陳謨罪案俟孫爾桂到京後訊明再
定著一併傳諭知之○壬戌諭軍機大臣等昨據明瑞等奏沿邊
關隘甚多在在駐兵防守則兵四分適爲敵餌若秋冬大舉深入
則賊匪必救護巢穴不暇分兵他出等語所見甚是已於摺內批

示今木邦重地已令額爾景額帶兵駐紮最爲扼要其餘如九龍江隴川黑山門等緊要處所固宜揀派精兵併力防守至於邊界蔓延一千餘里隘口零星原難槩行備禦且將來我兵大振聲威直搗巢穴賊匪等方將自救不暇又何能四出滋擾卽閒有遊魂假息竄入邊隘以爲牽制大軍之計亦不過所屬土司之地當令其堅壁清野以待彼亦何從肆其侵擾轉不必僕僕調撥致分兵力且如戶腊撒等沿邊一帶本屬土境地方該處夷民並非有蓋藏積聚戀土難遷卽遇賊警不難暫匿山箐避其焚劫原無庸屑屑爲之顧計也可將此傳諭明瑞知之

東華續錄

乾隆六十六

臣王先謙敬編

臣周倫蕃恭校

秋七月癸亥朔軍機大臣等議准陝甘總督吳達善奏嘉峪關外至哈密一路軍臺係屬新疆孔道一切遞送報函暨商旅往來不絕該處安設臺站原由安西行走前督臣楊應琚奏稱自靖逆沙州至哈密較靖逆歷安西而至哈密近一百六十里係將多餘里數勻分於各站之中以致人馬往還均虞疲乏經臣逐站查勘丈量沙州新路較之安西舊路實遠二百里有餘且沙州一帶水泉惡劣戈壁山坡縣長車輛易於竭蹶不惟文報稽遲卽馬匹亦多倒斃實爲官民往來之累若由舊路至哈密其長流水黃蘆岡二站水草豐美卽格子煙墩數站間多戈壁而沿途更有井泉味平

可飲兼之自安西以歷靖逆煙村相望民戶團居尤屬輿情所便
自宜循照前規將沙州臺站仍設安西至楊應琚於紅柳峽設有
拽運柴草車輛本屬苟且塗飾之計今臺站既議改移其車輛亦
裁又哈密既有欽差駐紮又有通判佐雜足資料理見在移駐哈
密之安西道無甚緊要應令仍同安西彈壓從之○甲子命軍前
奏事用清字行軍以鳴角爲號○福建巡撫莊有恭卒○乙丑嚴
定蒙古盜賣牧場馬匹罪○丁卯諭軍機大臣等軍機大臣會同
刑部審訊湯聘據稱孟良土司召丙人甚庸懦夷情不服以致該
處地方復爲賊匪殘破蔓延九龍江實係楊應琚用人之誤又稱
支放糧餉並無憑據可查以致承辦之知府達成阿不能銷算等
語孟良當緬匪滋擾之後必得強幹土司方足資其整頓楊應琚
徒以召丙會爲召散所遂遂不察其人之庸懦率令管理地方種

種貽誤舛謬已極著明瑞鄂甯卽體察孟良情形召丙不堪勝任
另擇夷人中素所畏服足資彈壓之人令其襲職以收驅策之效
至辦理糧餉必以檔冊爲憑始可杜冒濫侵漁之弊乃該處雖有
派員一切支放竟無稽查實據至今難於覈銷尤楊應琚措置乖
方所致並著該督撫將前後所辦軍需詳悉確查立法妥辦乘便
卽行奏聞○辛未諭軍機大臣等我兵進剿緬甸見在廣集兵糧
期以秋冬大舉自必勢如破竹迅奏膚功使西南邊境敕甯爲一
勞永逸之計但思緬地僻在荒徼兼以山巒重阻風氣隔閼將來
平定以後自難設立郡縣同於內地卽欲如新疆回部留駐大臣
坐鎮彈壓亦恐水土惡劣瘴癘時發我兵久駐非宜至匪酋惜駁
自其父喪藉牙篡弑以來濟惡虐眾連年侵擾邊地近復敢犯我
顏行尤爲貫盈孽重自當犁其巢穴翦彼鯨鯢以彰天朝威遠服

叛之典而既經勦滅其土地人民皆我幅員赤子亦不可不爲撫靖俾共享太平之福若欲另立酋長自無如仍擇莽瑞體苗裔但恐其後人久經禍亂或復選悞無能設竟委以重任未必能控羣蠻而闡聲教甚或同於井蛙之見仍然蠻觸相尋自滋猜釁轉於柔遠無益莫若量各城大小分置土司使各守其疆界不相聯屬則伊等勢渙情睽不能駢合爲一或可不致滋生事端亦眾建而少其力之意而各土司定則納賦咸受吏職更爲易於制馭但須度其疆域險易詳審制宜如阿瓦猛密木邦諸城自較爲重要其餘亦當酌量道里遠近畫界區分俾不相親附而所擇土司尤宜視其傾誠向化才堪效用而心可信任者授以土官俾之長世自衛共沐國恩其或桀驁叵測及強宗大姓雖一時震懾降附難必其不心懷兩端則當如回部之霍集斯等移其族黨妥爲安置以

示保全兼可永杜後患此皆大功告成後所必應籌辦及之者明瑞進兵時當隨地留心豫操成算將來辦理善後事宜即可就所經歷秩然有條措置自裕如矣至我大兵深入聲勢甚盛所向必皆披靡自不難掃蕩賊巢而既定阿瓦規模甫就遠人心志未必遽能齊一不可不暫出重兵以鎮之或外地不便久留則於邊境要區權宜遙控此亦凱旋時所當計及者著於明瑞奏報之便諭知之俾得從容籌度以期萬全○乙亥定試用人員因公降調送部引見例○辛巳調崔應階爲福建巡撫以李清時爲山東巡撫嵇璜爲河東河道總督裘曰修爲禮部尙書

由戶部左侍郎遷

○壬午

上奉 皇太后啓鑒秋獮木蘭○免經過地方本年額賦十分之

三○丙戌調范時紀爲戶部侍郎羅源漢爲倉場侍郎以倪承寬

爲禮部侍郎

由內閣學士遷

○丁亥諭軍機大臣等據明瑞奏稱楊甯於

進勦提調之任似非所長且自本邦退回不能服將士之心貴州提督譚五格曾任滇省有年請將譚五格就近與楊甯對調等語已明降諭旨將該提等對調矣楊甯原止令其統兵勦賊至於軍營提調諸務本非其所長且年齒漸就衰老留之在滇亦屬無益今既調任貴州卽令其赴黔任事譚五格久任滇中於該處情形素所諳習自可資其臂指之效至黔兵調赴雲南協勦者原係譚五格統領前往該提久與士卒相習驅策原易於用命且黔省尙有帶兵之副將等於本營董率約束亦爲便易所有在滇黔兵似著譚五格兼管尤無呼應不靈之慮將來統率進勦時總在明瑞斟酌調度以期迅速集事至索柱挾詐偷安已照所請革職令其自備資斧留滇效力所遺員缺緊要若由京補放恐道途遙遠到任需時該省見有揀發以副將委用人員著明瑞於此內揀選妥

員一面委署一面奏聞補授更爲妥速可將此傳諭知之○戊子
上奉 皇太后駐蹕避暑山莊○庚寅諭軍機大臣等今日明
瑞奏到各摺已明降諭旨並將原摺改寫臣字發鈔矣嗣後如奏
報軍務及一切地方公事俱照例稱臣著將此諭令明瑞知之○
辛卯明瑞鄂甯奏覆查木邦頭人原係罕莽底與緬匪壘藉牙父
子不睦彼此不時攻殺乾隆二十七年閒罕莽底病故緬匪擅將
罕莽底異母弟昆象立爲頭人木邦人眾不服將昆象戕害罕莽
底子線五格被緬匪挾以爲質木邦人又將罕莽底胞弟壘團立
爲頭人去歲楊應琚招撫壘團以木邦頭人在前明時原係宣慰
司職銜是以賞給壘團二品頂帶授爲宣慰司嗣因賊匪至木邦
占據地方該處夷民或爲賊匪所擄或竄伏山林惟壘團自攜三
百餘戶來奔線五格亦由賊地逃出與壘團在奔什南山居住此

次在木邦打仗其頭目人等並未幫助賊匪惟微末夷人內有不及避入山箐者被賊擄去役使尙無與賊合夥與我兵打仗等情
報聞

閏七月丙申諭巡撫莊有恭已經病故所有伊學政任內未完銀六萬餘兩著加恩寬免○甲寅諭楊應琚辦理緬匪一事調度乖方種種錯謬屢次所降諭旨甚明而其情罪難恕爲法所不容則不在於失機偵事而在前後掩飾支離有心欺罔去歲用楊應琚爲雲南總督查辦莽匪木匪事宜朕實推心委任伊於一切邊情軍務自當據實詳陳無稍隱飾方不負倚畀之恩迨其節次奏報殺賊萬人及欲受降撤兵朕覽奏時察其語涉荒唐傳諭詢問其欺偽情形乃漸次敗露並未有人在朕前參奏一字也至其罪狀彰著朕猶念其或係病中受人欺誑猶可云誤於不知屬於伊摺

內詳悉批示並傳寄諭旨反復開導不啻再三尙冀其翻然悔悟
逐一和盤托出以圖收效桑榆乃伊始終執迷不悟屢次覆奏各
摺仍然含混遮掩卽云病後神志昏迷實不能任此重務亦應早
爲披瀝直陳朕必另派人前往更代斷不令其耽延貽誤伊又計
不及此但一味朦朧心存欺飾實係伊自速重罪朕雖欲格外原
之亦不能廢法曲貸矣今楊應琚於鞫訊時俱已無可抵諱惟叩
求立置重典卽將伊明正典刑以彰國憲實屬情真罪當特念緬
匪一事原因劉藻前以養癰貽患以致畏懼自戕楊應琚至彼實
有不能不辦之勢而其初辦時尙無畏難之見情稍可原姑從寬
免其肆市但伊措置乖張致在事兵丁多所傷損此時朕卽欲貸
其一死伊亦何顏立於人世耶著派署刑部侍郎珠魯訥前往將
此旨傳諭楊應琚加恩賜令其自盡所有伊此次供單及從前覆

奏各摺並朕前後所降勸導各諭旨俱著一併鈔發俾中外咸共知之○戊午諭軍機大臣等鄂爾琿等奏據總兵書敏差弁到省面稟小猛崙地方約有賊匪千餘將防守兵練衝散閏七月初三日已到茨通見經提督譚五格帶領黔兵前往辦理等語已於摺內批諭矣看來此次竄至茨通賊匪似與緬子無涉若係緬匪敢於滋擾則當在永昌一路不應繞至普洱此等烏合之眾或是召散餘黨與扒先捧有仇見其退避遂乘勢欲圖報復或邊外難民結隊流竄因而滋事皆未可知見在譚五格統兵前往甚合機宜到彼總須相度實在情形或勦或逐迅速妥辦此時瘴氣尙盛譚五格亦不必帶兵深入靜聽明瑞於九月以後剋期大舉但滇省弁兵大率氣餒膽懦遇事不免風聲鶴唳驟難期其鼓勵將來進兵之時總恃京城勁旅壯軍聲而資制勝並濟以川黔新調之兵用

其銳氣自卽可克敵奏功至各處所有滇兵除防守外不必調充
征勦鄂甯見在省城辦理普洱之事總以鎮靜爲主卽譚五格書
敬亦不可稍涉張皇著將此傳諭明瑞鄂甯譚五格知之○是月
兩廣總督李侍堯奏遵旨檄諭暹羅國投擒奔竄緬匪一節傳詢
曾充暹羅國貢使船戶及通事等據稱自廣東虎門開船至安南
港口地名河仙鎮計水程七千三百里該處係安南管轄有土官
莫姓駐紮又自河仙鎮至占澤問地方計水程一千四百里係暹
羅管轄有土官普蘭駐紮自占澤問至暹羅城計水程一千六百
餘里統計自廣東虎門至暹羅共一萬三百餘里九月中旬北風
順利卽可開行如遇好風半月可到風帆不順約須四十餘日如
有公文照會暹羅交付土官莫姓及普蘭均可齎去但前往該國
係屬外洋內地兵船水道不熟未便令其前赴茲查有本港商船

於九月中旬自粵前往安南港口貿易計到彼日期正係十一月間查有左翼鎮標中營遊擊許全熟諳水務臣遵諭備繕照會暹羅國王之文發交附搭商船往安南港口諭令查探肅投仍令取該國王回文報聞

八月乙丑諭德保奏閏七月初八日賊匪滋擾小猛養地方是夜五鼓官兵聽得九龍江內有賊匪船隻聲音即將軍裝器械拋去各自逃散德保見在退駐思茅等語前據鄒甯譚五格奏稱有賊匪千餘潛渡小猛崙江已到茨通書敏由補角馳往堵逐至德保在九龍江會否馳援詢之書敏所差千總未能詳知譚五格隨帶黔兵千名前往辦理已傳諭譚五格相度妥辦矣德保在九龍江駐紮原係帶兵防守乃該兵丁等一聞賊匪聲息輒爾棄仗紛逃固由滇兵怯懦不堪風鶴皆驚難以復期鼓勵但兵丁遇有賊蹤

竟敢不顧統兵將領四散奔竄其情實爲可惡此必因前次楊甯在木邦打仗右翼官兵逃散未將查出逃兵嚴行治罪故九龍江兵丁仍蹈故轍此次若再不示以嚴懲則各處兵丁相率效尤何以飭軍律而作士氣况木邦之事尙可云楊甯初到正值楊應琚辦理不善之後是以未能振作茲則鄂甯在省籌辦普洱事宜明瑞到滇已將三月一切措置自當另具規模何以賊匪竄入邊界該處兵丁復有望風逃避之事豈明瑞等僅於永昌一帶籌畫進剿機宜而於普洱邊外未經留心調度乎亦不免疏略之失念其尙係初次姑從寬宥此後若再有此等情事明瑞鄂甯卽不能辭咎矣譚五格見雖馳往九龍江一帶其責在於剿逐賊匪至查辦逃兵一事非伊所能經理著鄂甯卽行前往該處確查辦理俟辦竣此事再赴永昌亦正當集兵進剿之時矣至德保所奏兵丁聞

有賊船卽行潛逃遠避如果係實情則德保尙可從寬免究以勵後效所有逃兵速卽查拏重加治罪以示懲儆若德保所奏不實或別有畏葸退縮情事卽將德保嚴參重處此項賊匪或係緬子由木邦繞至其地或係莽子由整欠闌入邊內抑係邊外避難土民借端滋擾俱應明晰確查又所稱兵丁多因染瘴患病不能禦賊果爾則賊眾又何能冒瘴遠來看來兵丁內未必無藉稱受瘴巧爲躲避者亦不可不徹底查覈並著明瑞鄂甯一併查明據實覆奏將此速行傳諭知之德保摺並著鈔寄○辛未諭軍機大臣等德保奏總兵書敏於閏七月二十日在九疊地方病故小猛崙等處俱被賊匪占踞關係緊要已於二十四日帶領官兵五百名自思茅前進剿賊一摺所奏總不明晰已於摺內批諭矣前經降旨令該撫鄂甯前往該處確查辦理鄂甯到後所有賊匪情形及

係何處烏合之眾並德保從前因何退至思茅今又領兵前進各情節自應查明具奏至九龍江邊外一帶見在瘴氣既盛譚五格帶領黔兵前往止宜相機勦逐妥協速辦使內地土司無擾以待將來大舉斷不可冒瘴深入亦無庸帶兵久駐邊外此等賊眾看來並非緬匪正賊不過召散餘黨或邊外流民借端滋擾土境原屬不成事體此時總宜靜鎮譚五格於辦竣此事後可暫回至思茅駐兵防守候將來進兵時再聽明瑞調度至所奏書敎病故一事或係病故或係染瘴身故及該鎮領兵向在何處因何欲回思茅在中途病故且書敎既在前德保何以先行退回亦著鄂甯查明覆奏再降諭旨著將此傳諭鄂甯譚五格及明瑞知之尋鄂甯奏覆查德保駐守九龍江於閏七月十七日逃回思茅復於二十四日領兵前往彼時賊匪已散無賊可勦乃並不據實奏明猶敢

以虛詞妄瀆其畏蕙欺蒙情節經臣等查奏自難逃洞鑒批實在可惡罪浮於李時升等亦是汝等公忠方能如此查奏若楊應琚又復欺奏矣然豈終能欺朕耶又奏查此股賊匪係召工召淵等爲首勾結鬼家整欠等處烏合之眾實非緬匪正賊書敏自賊匪竄入小猛崙不能堵禦由猛寬茨通退駐倚邦前據普洱府等報稱於閏七月二十日行至九疊地方病故查明委係染瘴所致至書敏與德保本係兩路分駐一在補角一在九龍江書敏因賊匪竄入退至倚邦離思茅尙有五站德保則在九龍江霄遁由小路直奔思茅是以德保退回在書敏之先批亦係退回無可寬罪○癸酉調董邦達爲禮部尙書袁日修爲工部尙書○丙子以溫敏爲盛京禮部侍郎由左副都御史遷○丁丑上自避暑山莊巡幸木蘭行圍○己卯諭嗣後蒙古王公子應襲者不必計其年歲卽給與

應得職銜○乙酉王檢因病解任以鍾音爲廣東巡撫奉寬爲兵

部右侍郎

由內閣學士遷

○己丑賜哈薩克汗阿布賚敕諭曰伊犁將軍

大臣派員護送爾使臣至木蘭入覲將爾所呈之書具奏霍罕額

爾德尼伯克於去歲殺爾弟依斯干達爾汗又殺其四子擄其妻

子以去爾等前往攻戰擊殺多人額爾德尼敗北入畢什克特城

內不出爾欲攻取城池又無大礮仰懇大皇帝發兵二萬並乞大

礮等語所奏甚屬過當爾哈薩克霍罕等皆係歸服朕之臣僕額

爾德尼在朕前並無過犯豈有助一臣僕攻一臣僕之理如因爾

請兵攻額爾德尼朕卽行賞給儻伊亦因攻擊爾等請兵朕又將

何以處之此事斷不可行且數年爾等漸近內地遊牧經我將軍

大臣等具奏欲行治罪朕加恩曲爲寬免茲復降旨卡座以內空

閒地方准爾等窮民遊牧此特因爾等均屬恭順之藩夷俾各得

休養安生爾宜與同藩和好以圖永沐朕恩如一味仇殺彼此報復又何所底止此兩敗俱傷之事也適額爾德尼亦遣使恭請朕安到時朕亦如此訓示朕爲天下共主所有歸服藩夷臣僕俱一體眷顧並無左袒爾所遣來使都勒特克等朕施恩令其瞻仰隨圍與宴賞賚有加又特賜爾蟒段等物交爾使臣齎回爾惟恪共臣職和睦同藩勿替朕嘉惠至意特諭○諭前據德保屢次奏報見其詞語閃爍支離卽料其必有畏葸捏飾情形諭令鄂甯前往查辦昨德保復由六百里馳奏則於賊退之後領兵前往詭稱賊匪逃遁翼文其過種種荒唐欺飾之處不能自掩已降旨將伊革職今據譚五格奏德保在九龍江並未見有賊蹤一聞干總蘇起文稟報檄攔壩官兵被賊衝散之信卽令土司刁維屏引往小路而走眾官兵亦隨俱走致所存兵糧軍械被賊燒搶等語情罪

甚屬可惡實出常理之外聞之不勝髮指前因滇省綠營將領怯懦債事嚴行懲創德保於今春陞見時請赴軍營出力念其係滿洲世僕必知顧惜顏面倍加奮勉是以將伊調任滇省乃伊於九龍江一帶並未遇賊輒爾心存懼怯一聞謊報賊信不但不能董率兵丁向前勦擊轉從小路退回致官兵相隨潰散並將兵糧軍械棄置不顧且屢次誑奏欲飾其退避之迹其無恥喪心與綠營惡習何異思之實堪痛恨著傳諭鄂甯將德保鎖拏解京治罪並須遴選妥幹之員沿途小心管解毋稍疏虞致令畏罪自戕所有報聞賊信之干總蘇起文亦著革職拏問解京究訊德保家產見已查封其任所貲財著鄂甯一併查辦至書敏在小猛崙遇賊不能身先士卒衝鋒打仗僅隔江施放槍礮已屬畏葸不堪乃僅留都司那蘇泰在彼堵禦而已退回三十里外之緬寺駐紮其罪更

爲可惡使伊尙在必當重治其罪今既身故已爲倖逃軍律其屍骸不必官爲料理送京至譚五格身任提督所屬總兵皆資統轄乃見德保如此退縮並不嚴行叅劾請治其罪僅照常聲敘奏聞殊屬不知事體譚五格著傳旨嚴行申飭並傳諭明瑞知之

九月壬辰朔以鄂忻爲左副都御史

由郎中遷

○壬寅

上駐蹕避暑

山莊○甲辰明瑞額爾景額奏查進剿緬匪之兵由京派出八旗滿兵三千名檄調四川兵八千名貴州兵一萬名內除派往普洱兵一千尙餘九千本省兵五千共綠旗兵二萬二千名俟陸續到齊之日臣等擬將大臣侍衛各官員分領三路互相策應一路自宛頂出口由木邦前進木邦係夷部四通之地最爲緊要應派兩營滿兵一千餘名三省綠旗兵七千餘名臣明瑞親自統領派滿洲領隊大臣扎拉豐阿伯玉魯斯總兵國柱李全一同行走一路

自鐵壁關出口由猛密前進此一路與新街水路較近大金江以外夷人亦宜鎮以威力應派兩營滿兵九百餘名三省綠旗兵七千餘名臣額勒登額同提督譚五格統領商辦派總兵王玉廷一同行走奉硃批令額爾景額在此路總統又令珠魯訥前往珠魯訥未到之前如木邦地方需人時將譚五格暫行留駐又奏再扎防以南由山前經過猛固猛浦此一路更屬險隘由此派兵前往與猛密中路互爲聲援且可直搗賊匪巢穴但此路能多容兵馬應酌派兩營滿兵九百名三省綠旗兵三千餘名令領隊大臣觀音保統領派總兵長青一同行走又批額爾景額觀音保此二人汝再酌定又奏將乾清門侍衛及一百名巴圖魯侍衛官員兵丁分爲三隊在緊要地方備用尙餘二省綠旗兵四千餘名令總兵達興阿統領至木邦後駐防永昌至木邦山多路窄各隊兵丁不

能擁集一處令駐紮木邦兵在進剿兵之後兩三日陸續起程再將該夷部之兵調撥四千名伊熟悉山路林箐帶領行走以爲犄角之勢使賊匪驚潰可蓄我兵力以備臨陣接衝將續行趕到者酌派各隊餘添於騰越州駐紮防守又查龍陵原有駐兵千餘名杉木籠駐兵二千餘名進兵之後龍陵已屬內地毋庸駐兵將此駐兵千餘名挑取數百名令在木邦行走使之熟悉道路餘移於宛頂黑山門等處駐紮以爲木邦接應杉木籠原駐兵二千餘名特爲防守騰越州隘口而設未便改移仍駐紮總匯之處臣思賊匪節次抗拒官兵今秋大兵進剿伊等亦必揣知豫防惟及早進兵乘其不備三路合攻藏功似屬較易得旨佇待汝等捷音○丁未 上奉 皇太后自避暑山莊回鑾○以喀甯阿署刑部侍郎富明安署山西布政使○辛亥以尹嘉銓爲山西按察使

由甘肅
西甯道

遷○癸丑 上奉 皇太后還京師○己未諭見在雲南綠營兵丁武藝平常而戰陣怯弱毫無勇往之氣風俗頹敝此皆歷任督臣不行整頓任其積習相沿所致從前愛必達劉藻吳達善曾任彼處總督平日不以武備爲事以致流弊至於此極也膺封疆要任者如此辦事必當嚴示懲創愛必達已治其罪劉藻亦業已身故吳達善著交部嚴加察議爲各督臣炯戒

冬十月辛酉朔以永甯爲內閣學士

原任盛京禮部侍郎

○壬戌諭朕檢閱

朝審官犯冊內李因培辦理馮其柘虧空一案始爲減數具題繼復授意彌補甚至將據實揭報之知府錫爾達不惟不加賞識轉欲別爲搆繫指參其爲昧天良而飢國惠實非尋常干犯功令者可比封疆大臣受朕深恩分應奉公守法乃因迴護曾經保題庫貯無虧而甘心罔上行私推其流弊勢將何所不至卽明正顯戮

亦其罪所應得第念前此和其衷徇庇段成功之案雖同一彌補虧空而先經收受賂遺其貪黷欺蒙情尤可惡是以卽行予勾以李因培較之尙無得贓之款與和其衷究屬有閒若槩令肆市權衡殊未允符然欲更爲曲貸則準之情法均不可以爲訓因命侍郎四達御前侍衛索諾木策凌前往傳諭加恩賜令自盡以存大臣之體特恐庸愚無識之徒或謂李因培與莊有恭皆係巡撫徇庇屬員獲譴而一則竟予復職一則僅令自裁未免妄生擬議殊不知莊有恭於段成功之巧爲開脫與臬司知府等有意從寬彼此相喻無言尙未有顯然授意指使情節猶屬外吏相沿積習是以定讞示懲旋仍施恩錄用揆諸李因培之任意舞文乖張挾詐者迥不相類並非輕於莊有恭而重於李因培也再如湯聘身爲撫臣目擊總督楊應琚欺謾僨事並無一言入告自不得不加以

重罰然湯聘不過一庸懦無能隨人俯仰之人耳使以他人處此亦未必不蹈其故轍求其二莅滇境卽具摺盡發其奸不過鄂甯等公忠體國者能之豈可以之深責湯聘哉是其罪尙可量從末減已命法司改入緩決以昭平允夫刑賞國家大柄朕臨御以來慎重刑章雖細民案牘無不詳加校覈務使無纖毫之爽况以大員重案視其情罪虛衷斟酌適輕適重各如其人之自取而無所容心其犯出無心者雖必示之懲創未嘗不許其湔滌自新且或棄瑕錄用若其營私藐法肇由自作此而曲爲姑息將使職任封圻者互相效尤如用人何如國典何四人皆係大臣其治罪差等判然難以槩例者如此不得不明切曉示俾各省督撫知朕明罰敕法一秉大公卽朕亦不得自主惟其人之自取尙其共知儆惕副朕整飭官方激清吏治之至意將此通諭中外知之○以伊克

坦布謝墉俱爲內閣學士

伊克坦布由內閣侍讀學士謝墉由翰林院侍讀學士遷

○癸亥諭

軍機大臣等據明瑞奏稱猛密一路進兵必得更事大員方於事務有益見派額勒登額譚五格同往一切進攻事宜委之額勒登額綠營兵丁令譚五格統領至駐紮木邦辦事最爲緊要珠魯訥一時不能遽到進兵後一切機宜明瑞仍同額爾景額辦理俟珠魯訥到日額爾景額再領兵由猛密一路續進等語明瑞等此奏殊未達朕意朕命額爾景額統領此路者非不用譚五格與額勒登額也止以各路進兵參以綠營必和衷共濟方於事體有益譚五格出自包衣佐領雖久任提臣未更戰陣額勒登額雖久任戎行未免有烏拉齊習氣器度狹隘若令二人同在一路必至各執己見於事無益額爾景額身係滿洲雖未經戰陣若論辦事額勒登額決不能及伊係參贊大臣令其統領大兵應約束者約束應

調停者調停既可收兵丁之力而額勒登額等亦不至各執己見矣若謂珠魯訥不能遽到進兵後木邦辦事乏人殊不知大兵前發木邦已成腹地有何可慮一切事務留一軍機章京在彼俟珠魯訥到時即可交代明白著傳諭明瑞等卽遵照辦理○分江蘇

泰州屬東臺鎮爲東臺縣裁東臺同知缺爲知縣泰州州判缺爲東臺水利縣丞○召夔舒來京調宮兆麟爲雲南按察使以梁國

治爲湖南按察使

由山西冀甯道遷

○己卯諭軍機大臣等據明瑞奏稱

猛密一路甚屬緊要額勒登額事體練達故派於此路額爾景額暫留木邦俟珠魯訥到彼卽帶兵續進等語明瑞此奏竟視額爾景額與額勒登額等矣前據伊等以猛密一路派額勒登額並令譚五格同往管轄綠旗兵丁額爾景額同明瑞暫駐木邦辦事俟珠魯訥到日再行領兵前進朕卽降旨以譚五格出自包衣佐領

未更戰陣額勒登額雖經戰陣而有烏拉齊習氣額爾景額身係滿洲辦事亦非額勒登額所能及令其統領大兵既可收兵丁之力而額勒登額等亦不敢各執己見今明瑞尙未奉到此旨是以復爲此奏著傳諭明瑞猛密一路仍遵朕前旨令額爾景額統領行走至伊等已抵何處情形若何卽速奏聞額爾景額亦不可稍存推諉總當彼此和衷以期濟事朕深爲爾等望之○庚辰諭明瑞前在伊犁原任將軍今又帶兵前往雲南整飭兵丁進剿緬匪一切事宜係伊統理雖係總督見在行閱究以將軍名號足彰威烈明瑞著爲將軍管理總督事務○丙戌召周景柱來京以蔡鴻業爲甘肅按察使

由鞏秦階道遷

十一月丙申頒秋審條例於各省○戊戌諭月令有冬至麋角解之文欽天監時憲書久經沿襲登載前以鹿與麋皆解角於夏卽

疑禮經傳習不無承謫嘗著鹿角記爲之辨論而未究其所由昨因時值長至偶憶南苑內欄有馴育之麋俗名長尾鹿者此時曾否解角令御前侍衛五福前往驗視則蛻角或雙或隻正與節候相叶並持新蛻之角呈覽自來疑義爲之頓釋說文有訓麋爲麋屬之語名苑又稱鹿大者曰麋然三者實迥然不同北人知之而南人則弗能辨是以展轉滋舛夫窮理格物乃稽古所必資已詳爲著說以識並著將此交與欽天監自後時憲書內卽行改麋爲麋俾示信四海毋仍昔誤○諭方觀承題參子牙河通判張荏怠玩誤公復擾累鋪民一本已降旨將該員革職看來張荏曠官滋事雖咎由自取然究其所以實因本籍之人得爲本地河員以致易滋弊端則向來河工各官准令原籍人員投效立法未爲盡善在定例之意雖爲人地相習起見殊不知地方官迴避本省何嘗

因籍屬遠離必難資駕輕就熟之效學養子而後嫁已爲自古所
議且河道總督及河道等大員隔省簡用於河務自能諳練又何
必獨令屬員就近服官不爲防微杜漸之計耶嗣後所有河員不
避原籍之例永行停止其見在河工本省人員作何對調之處著
各該總河酌量分別咨部另行妥議具奏○甲辰諭朕幾務之暇
時及臨池閱年旣多每自驗詣力覺往日所書未能愜意凡內府
藏弄卷軸及宮殿苑囿題詠者屢經更易惟從前頒賜臣工御書
尙多舊時筆法昔宋米芾以轉益多師擅長藝苑麻牋十萬散布
人間每欲持以換少年之作人或靳之朕非欲與藝林文士較長
翰墨之間第工候淺深旣堪自證又豈肯惜一舉手之勞而不臻
覈實求精之境耶所有乾隆二十年以前賞過內外大臣等御書
俱著繳進候朕酌量換寫給還其已經成造扁聯及摹勒上石者

仍將墨蹟原本呈繳聽候另換○乙巳命翰林院讀講學士及詹事府庶子等官京察照四五品京堂歸王大臣驗看列爲等次引見○壬子召范時綬來京調鄂寶爲湖北巡撫以良卿署貴州巡撫

由布政使署

○癸丑諭軍機大臣等據明瑞奏稱伊等領兵至木邦

緬匪棄城而遁所遺糧米除給兵丁口糧外尙有麤糧五六百石俟珠魯訥到時碾米以爲木邦駐紮兵丁口糧其遙遠村莊人戶俱已逃匿糧米應令搜查等語軍行口糧最爲緊要明瑞所辦深合機宜但木邦之人爲緬匪蹂躪暫出逃匿一聞大兵駐紮必陸續來歸前據明瑞奏稱寶圖尙屬可用卽將寶圖留於珠魯訥處令其招聚伊屬下逃散人戶伊等逃竄之際糧米諒多埋藏來歸人等將所知者獻出加以獎賞或給價購買可省內地轉運之勞著諭明瑞珠魯訥等留意遵照辦理再附近木邦土司宜招撫者

卽行招撫其難信者亦宜作速辦理以靖進兵後路○調張達堯
爲貴州布政使海明爲四川布政使佛德爲甘肅布政使以何焜
爲河南布政使兼管河工事楊景素爲河南按察使

由福建汀
漳龍道遷

十二月辛酉朔諭軍機大臣等前據額爾景額具奏分兵自猛密
一路前進於龍泉地方生擒賊謀審訊等語迄今半月有餘並無
摺奏額爾景額前進距馬膊子山老官屯不遠諒不日卽可抵阿
瓦城伊等到彼情形何以不行具奏朕深爲慮念昨據明瑞奏稱
自木邦前進不設臺站派兵遞送事件朕節經降旨令珠魯訥由
留駐木邦兵內派千餘名接應設臺額爾景額一路如何馳遞事
件亦宜與明瑞豫爲熟籌乃明瑞將木邦以外馳遞之事具奏而
額爾景額並未籌及又許久亦未奏事朕已降旨鄂爾令其亦照
本邦一路辦理至明瑞自木邦前進抵白小地方攻取賊匪隘口

營壘令官兵分頭登兩面山峰攀緣憑高而下賊匪措手不及攻
破營壘所辦深爲得力著傳諭額爾景額攻取隘口亦應照此辦
理再發去花翎十支藍翎二十支交鄂甯遣官兵送交額爾景額
秉公賞給奮勉官兵以示鼓勵此時伊至何處事體若何之處奉
到此旨卽速奏聞○壬戌以汪廷璽爲內閣學士由詹事府遷○申甫緣
事解任以傅爲訖爲左副都御史由宗人府府丞遷○己巳諭朕披閱清

文鑑定本見所列文武官階尙有未盡妥協者如文職自二品以
下減分正從惟一品俱誥授光祿大夫未別等差而一品武職所
授榮祿大夫考之前代本屬文臣一品所授之階若移爲從一品
文臣封典於體制更爲盡善至文武事同一體武職二品至六品
並分正從而一品七品獨未區分亦未免參差失當著吏部兵部
酌古準今詳覈定議具奏至清文內所有文武官階繙譯之處並

著繕書房詳妥改定俾品目秩然以昭畫一尋讓嗣後文職從一品誥授榮祿大夫武職正一品誥授建威大夫從一品誥授振威大夫正七品授奮武郎從七品授奮武佐郎從之○壬申以羅布藏錫喇布爲理藩院額外侍郎教漢輔國公○甲戌諭楊甯在木邦與賊匪打仗未能盡力勦滅且辦理諸事均不妥協著革職發往伊犁自備資斧效力贖罪○丙子諭湖南學政盧文弨條奏一摺全屬不諳事體其意專務弋取虛名於學校士習大有關係已據各該部按款縷晰議駁卽如所奏州縣官責處生員應申報學臣一條此係乾隆元年議准條例載在學政全書者已爲深切著明今該學政復多方附會有心爲不肖青衿開寬縱之漸殊不知士子果能安分自愛地方有司自應優以禮貌若其甘爲敗檢法所難寬則按律示懲俾知悛改且以儆戒其餘則其所保全者甚多該

學政乃巧爲祖庇撥拾瀆陳是將使恃符滋事者恣意妄爲自干
法網愛之非適以害之乎至所稱民人控士子令教官接受傳訊
劣等苗徭生員免其對讀及散給貧生租銀請照兵丁紅白事例
數條既使司鐸者侵官滋弊且令考覈失勸懲之義卽貧開冒濫
之端皆屬曲意徇市恩邀譽於整飭士風之道毫無裨益盧文
弼所見如此紕繆若仍令其典司學政必致諸生罔知繩檢風氣
日漓豈朕造就多士之本意耶盧文弼著卽撤回交該部嚴加議
處○戊寅諭軍機大臣等據明瑞奏稱帶兵至大疊江選會水兵
丁搶搭橋梁過渡直抵錫箔生擒賊匪五名據供錫箔向有緬子
擺夷千餘人數日前聞大兵進剿俱各避去隨將捉獲賊匪正法
復於附近地方搜出埋藏米穀等語明瑞帶兵抵大疊江搭橋搶
渡訊得賊匪情形搜獲米穀甚屬可嘉大兵一至賊匪聞風卽遁

儻欲於險要地方合力以拒我兵我兵過渡畢竟費力今此等險
要地方並無賊匪拒守即使合力拒我諒亦有限大兵雲集自可
剿滅奏功著傳諭明瑞伊等見抵何處如何剿戮賊匪一得捷音
迅速奏聞再今日賞御前大臣額駙等福字明瑞奏摺適到昨已
賞伊福字今再賞給伊母並發去小荷包六箇火鏢一箇鼻煙壺
一箇賞賜明瑞著傳諭知之○明瑞奏大兵出木邦交界經過大
山所屬波竜等處土司頭目均極恭順並稱伊等被緬匪蹂躪不
能爲敵今大兵一到各部落均享太平該地米糧甚豐酌量採買
作爲木邦兵丁口糧可省內地轉運前來獻馬牛人等已量加獎
賞並給土司羅外耀特頂帶令往木邦見參贊大臣珠魯訥卽會
同彼處土司鹽團協助防守並將大兵經過隘口及軍營情形俱
寫清字一分令其遣熟識路途之人從深山捷徑送至猛密交額

爾景額閱看得旨所辦可嘉爾景額之摺月餘未至甚爲廬念不能釋懷汝處若得信時速行具奏○己卯諭據額勒登額奏稱參贊大臣額爾景額領兵攻取緬匪木城晝夜靡甯積勞身死殊堪憫惻朕心不勝悼惜著加恩贈都統職銜應得卹典該部察例具奏再額爾景額雖係病故然時在戰陣與軍營病故不同著該部將應給世職之處議奏○諭軍機大臣等據額勒登額等奏稱伊等帶兵至老官屯圍攻木城賊匪死守驟不能下恐傷損兵丁因收兵於形勝地方設卡防範以便相機辦理等語此路勦辦賊匪最爲緊要額爾景額業經病故額勒登額著授爲參贊大臣伊柱授領隊大臣看來賊匪爲官兵圍攻勢已窮蹙額勒登額等宜相度機宜擣其巢穴以奏膚功但路險地狹賊匪結壘固守而我兵一力以攻城爲務難保必無傷損不若以計攻取卽如賊匪固

守木城其旁有江我兵或於遠處爲造舟搭橋之形設疑以誘僞賊匪前來衝擊則乘機可以勦戮卽彼覺而不出不過嬰城自守諒無他技我若別尋路徑紆道而進置此城於軍後賊必棄城不守亦可乘機勦殺若專以攻城爲務賊反得以逸待勞矣惟宜斟酌萬全方爲有益觀額勒登額此路情形明瑞前進若遇此等要隘賊匪亦必死守能卽行勦克固好如稍費力總當以計攻取或明瑞暫撤兵回木邦額勒登額暫撤兵回鐵壁關熟計情形再進俾得迅速完結但此亦設想之言諒亦必不至此惟地方遙遠總宜熟籌妥辦如於無益之地徒傷兵丁或遇險阻之處伊等拌命死戰則斷不可著諭明瑞額勒登額等知之再額勒登額此次攻取木城官兵陣亡者九十名得傷者四十餘名此內或係滿洲係綠旗或有土司獵夷人等之處著查明奏聞○庚辰原任禮部侍

耶齊召南坐徇隱近族齊周華逆詞革職○辛巳諭前經降旨令河員一體迴避原籍旋據總河嵇璜奏請將河南山東兩省河工人員彼此酌量調補吏部議覆欲俟直隸江南一併詳查咨明到部再爲通行駁議朕意各該省河工員數多寡旣不能適均卽酌量對調亦難於恰當而其中酌調江南河員一節視他省尤不免更費周章蓋南河額缺本繁若撥往北省惟河南山東毗連各處情形猶不甚懸至以直隸工務相較南北不同辦理轉恐未能妥協因思此等人員專管河工原非地方有司經理民事者可比但不至近鄰鄉里與親故難以避嫌其於職守官方原無隔礙嗣後凡河工同知以下各員有官居本省而距家在三百里以外者俱准其毋庸迴避如此則工員不致移調紛煩而河務益可駕輕就熟實爲一舉兩得著各該督等卽遵旨妥協籌辦具摺奏聞○王

午吏部議覆廣東布政使胡文伯奏鄉會試考官取中之人適爲
上司下屬或迴避另補或咨部存案定例褻嚴惟受業師生向無
其例查受業師生情誼較鄉會師生尤爲親切自應一體照辦應
如所奏嗣後外任官員受業之人爲上司而業師爲屬員令官小
者迴避業師爲督撫司道受業爲屬員者分別報部存案遇有舉
劾隨本聲明至知府直隸州知州與所屬州縣刑名錢穀盤查尤
關緊要業師爲知府直隸州知州受業爲屬員亦令官小者迴避
著該督撫於見任別府州縣內酌調若在部月選出缺有受業師
生應迴避者令該員於過堂時呈明以別缺掣補隱匿不報及捏
稱師生希圖規避者議處從之○是歲朝鮮安南來貢○會計天
下民穀數各省通共大小男婦二萬九百八十三萬九千五百四
十六名口各省通共存倉米穀三千八百六十一萬九千二百二

十四石七斗五升九合四勺零